

# Kyrkjebladet

**nr. 2** Kyrkjeblad for Gloppen mai 2018 Årgang 48



LIV

**Tema LIV**

Ja, så kom då endeleg mai med vår og eit nytt nummer av kyrkjebladet! Om våren vaknar nytt liv, og dette bladet har eitt ord som samlar mange ulike emne: LIV. Gunn Hole skriv om å ta vare på skaparverket, og om å bygge bruer for gode samliv. Reidun Hjartholm trur på Skaparen, og vil vise livet i trua og i skaparverket i kunsten sin, og diktaren Martin Halsbog skrev sin eigen nasjonalhymne. Konfirmasjonstida hører naturleg inn under temaet liv, med aktive grupper, iskaldt sjøbad og reflektert ungdom som går gjennom konfirmasjonstida mot det nye ungdomslivet. Dette prøver vi å spegle i dette nummeret.

**Redaksjonen redusert**

Sjølv om det er kort tid sidan påskenummeret kom, har vi eit fyldig blad også denne gongen. Vi takkar alle som velvilleg skriv og fotograferer når dei får spørsmålet. Redaksjonen gjer som vanleg ein god innsats, men vi er litt underbemannata, for hyarane har ikkje fast medlem i redaksjonen for tida. Soknerådet tek ansvar og leverer stoff. Vi håpar likevel at einkvan av dei som no er spurde og har sagt nei, tenkjer ein gong til og blir med i redaksjonen, ikkje mest for hyarane sin del, men fordi vi i redaksjonen treng å ha ein hyar på møta våre. Viss det er avstanden Hyen-Sandane som er problemet, kan vi vurdere å legge møte til Hyen.

**Distributør-korpset**

Det er nokre få endringar i lista over frivillige som deler ut blad i postkassene, men general Harald held stødig i roret på den skuta, så alle får minst det dei skal ha. Vi har brukt å ha ein takkefest for dei frivillige medarbeidarane, men i år bestemte vi oss for å gjøre noko anna. Er du mellom dei som skriv eller fotograferer eller deler ut blad, får du før sommaren ei innbyding til ein innhaldsrik tur i nærområdet laurdag 1. september.

**Tyrkflei igjen**

Vi seier oss leie for at vi ikkje greier å levere prikkfritt på det skriftlege. Vi kan ikkje forklare korleis det har skjedd, men arbeider heile tida med å skjerpe både rutiner og eigen observasjon. Det er ille nok når det kryr med bindestrek inne i spaltene, men endå verre når namn blir feil eller blir utelatne. Vi må berre beklage på det sterkeste at det mangla eit dåpsbarn på siste lista, og at fadrane vart oppførte under eit anna namn! I dette nummeret måtte vår faste korrekturlesar få sleppe, og vi brukar «vikar», men vonar at alt likevel skal vere rett denne gongen.



**Innhold**  
nr. 2

*Det vart eit iskaldt vårbad for konfirmantane i Vereide. Påskeplask kan du sjå og lese om på side 18. Foto: Lars-Bjarte Osland.*

**TEMA: LIV**

Per Ståle Husevåg skriv om liv i nåden	03
Bygg bruer for livet. Gunn Hole skriv leiarartikkel	05
Vern om skaparverket. Enquete ved Gunn Hole	06
Reidun målar skaparen sitt verk	12
Fagert er Norge. Diktet og diktaren ved Harald Aske	38

**MØTE MED MENNESKE**

Harald Aske har snakka med Magne Tennebø	08
Møt ein positiv konfirmant i samtale med Venke	24

**DETTE VAR VI MED PÅ**

Palmesving og Hosiannarop med seksårsbok og dåp	14
Salmekveld med Eivind Skeie og korbesøk	16
Sportsgudsteneste på Even Hole cup	28
Seksårsboka til hyarane	32
Konsert med søskena Hopland i Hyen	34
Misjonsgudsteneste i Breim	36

**KONFIRMASJONSTID**

Iskaldt påskeplask etter høgmessa	20
Fasteaksjonen gav inntekt	25
Konfirmantar i fritt uteliv med Morten Leirgul	26
Namneliste over årets konfirmantar	47

**TING SKAL SKJE**


Krik Action til sommaren. Skal du bli med?	30
TRU sine planar for framtida	31
Ten Sing-festival	31
Bjørgvin bispedøme feirar 950 år med dronning Sonja til stades	40

**ANNA FAST FØDE**

Asbjørgs klipp frå litteraturen	19
Barnesider	22
Spaltist Morten skriv om å tenke på det som var	39
Kari skriv om Orheim-salmen «Eg har ei teneste stor»	44



Per Ståle Husevåg



# Å gjere nåde

**E**g tok til å arbeide som sosialarbeider for 25 år sidan, og arbeider no som terapeut, og dette arbeidet gjer at eg kjem tett inn på mange ulike typer menneske. I livet elles kjem vi også i kontakt med mange ulike menneske, men vi som arbeider med å hjelpe folk i vanskelege livssituasjoner, kjem endå tettare på enn i dagleglivet.

Under eit av dei første seminara eg var på i regi av Bergensklinikkanne, om behandling av rusavhengige, sa kurshaldaren noko eg har hugsa sidan: "Du må like klientane dine, elles kan du ikkje hjelpe dei." Rådet har følgt meg vidare i arbeidet. Terapiforskinga seier det same. Relasjonen er den viktigaste enkeltfaktoren for eit positivt resultat av terapi. Det er avgjerande at ein likar den ein skal hjelpe, elles vert det uråd å samarbeide på ein god måte. Eit menneske ein ikkje forstår, kan vere eit menneske ein ikkje kjenner godt nok, og såleis finn det vanskeleg å like.

Evangelia syner oss korleis Jesus viser eit unikt mot og ei tydeleg evne til å sjå forbi det vi andre hengjer oss opp i. Livsførsel, livsvalg, feilsteg, strev – han ser mennesket bak og møter dei der dei er. Forteljinga om Sakkeus har eit drama ein lett kan misse av syn. (Luk. 19). Snyltaren, utpressaren og quislingen Sakkeus blir sett av Jesus der han sit i treet sitt. Han blir ikkje sett med mine og dine øye. Vi ville nok heller sett forbi, vendt blikket

ned eller bort på noko anna, eller diskret eller ope synt vår forakt. Jesus ser forbi det dei menneska såg, som kjende tollaren Sakkeus, og visste kva slags kar han var. Og Jesus turde å ta inn hjå denne mannen. Lukas fortel: Då Jesus kom dit, såg han opp og sa til han: «Sakkeus, skund deg og kom ned! For i dag må eg ta inn i ditt hus.»

Legg merke til at Jesus MÅ ta inn hjå Sakkeus.

Ingen krav, ingen vilkår. Dette var uhørt på Jesu tid. Overtollaren var ein som samarbeidde med den romerske okkupasjonsmakta. Lukas skriv: Men alle som såg det, murra og sa: "Han har teke inn hos ein syndig mann."

Jesus gjer nåde. Han syner at nåde er ikkje eit svevande begrep, men handling. I møtet mellom Jesus og Sakkeus ser Jesus forbi alt som står i vegen. Jesus møter og likar Sakkeus der han er. Han vil bruke dagen saman med han, og MÅ ta inn med Sakkeus.

Kan vitru på ein slik Gud som er annleis enn det vi kan vere, vi som lettast elskar det som er elsk-verdig for oss? Vi som treng å like og bli likt? Å tru på ein nådig Gud, er å tru at det Jesus gjorde i møte med Sakkeus også gjeld for meg og deg. Nåden har sin grunn i Gud. Nåden er ikkje teori, den er eit verb, noko Gud gjer, eller gjev. Utan vilkår. Fordi han ser forbi alt som kan stengje. Det er fint og godt å bli møtt av ein nådefull Gud, og det er rørande når menneske møter kvarandre med nåde.



## Kyrkjelydstur til Selja 8. juli

Førebelser er det ein ide og ei overskrift. Men soknerådet har tenkt å sjå næra-re på korleis ein slik tur kan arrangerast. Kanskje vil ein vere sikra god transport også frå Selje sentrum til øya, ved å melde seg på ein slik felle-stur. Fellesskapet i ein buss til og frå, er òg noko anna enn å sitje i sin eigen bil. Ein veit at det blir arbeidd med liknande plan i Stryn, etter at ein i fjor såg at jølstringane kom med eit heilt bussfølgje, arrangert av kyrkjelyden. Det skal ikkje mangle på opplysnin-gar i komande nummer av Kyrkjebla-det. Lenger bak i bladet kan du lese meir om 950-årsjubileet for Bjørgvin bispedøme, om Seljumannamessa og om kongeleg besök i høve dagen!

## Naustmesse ved Bergsetnausta

### 2. pinsedag

I år blir det attre naustmesse i den veglause stranda tvers over fjorden frå Utvik, der Bergsetnausta og Sølvbergsnausta ligg. Gudstenesta tek til kl. 12.00 21. mai. Det er kyrkjelydane i Stryn og Hornindal som held messe, men som alle gudstenester, er denne opa for alle som vil, gratis av berre nåde (gratier)! Vi vil tipse om at ein kan køyre langt ned om nedste bøane på Bergset og parkere der, så er ikkje turen ned Bergsetberget så lang, om ein kan tolke nokre høge steg her og der nedover. Vil ein gå ein lettare veg opp, er Sølvbergsberget flatare å gå, og utan høge trinn. Men då må den sprekaste i bilen skunde seg inn til Bergset og ned til parkeringsplassen medan reisefølgjet ventar på Sølvberg og slår av ein prat med dei innfødde!

### Neste nummer

av kyrkjebladet kjem om ikkje lengre! Dersom du veit om noko viktig som må stå der, kan du tipse oss eller skrive sjølv. Redaksjonen skal ha møte 9. mai, så det er nok over når du les dette, men du kan ta kontakt likevel. Det er frist for levering av stoff 25. mai og du skal ha bladet i handa midt i juni. Vi skal nok prøve å få med bilde av flest mogeleg av konfirmasjonane, og alt som skal skje på kyrkjelyd hald i sommar, vil bli annonsert. Kanskje du brukar å reise på ein leir eller eit stemne, og vil anbefale det til fleire? Det er berre å vere om seg!



Den store kyrkjeklokka i Vereide vart sett inn i 1989 og har eit solid oppheng. Til venstre ser du «ham-maren» som slår dei enkle slaga. Oppå pô klokka ser vi Jesus på krossen, og nedanfor står: Kristus er oppstaden, lovsyng Gud i hans heilagdom.

## Kvifor 3 x 3 klokkeslag?

TEKST OG FOTO: HARALD ASKE

I snart 2000 år har folk i Europa feira dette store underet at Gud vart menneske i Jesus Kristus. I hundrevis av år har kyrkjeklokkenene kalla til Angelus-bøn tre gonger kvar dag, året rundt, med sine tre gonger tre klokkeslag.

Framleis kimar kyrkjeklokkenene i katolske kyrkjer morgen – middag – kveld. Katolikkane legg dette i bøna: Dei fyrste tre slaga: Engelen Gabriel spør Maria: Vil du? Dei neste tre slaga: Maria svarar: Ja! Dei siste tre slaga: Kristus vert unnfanga i mors liv. Deretter kiming med klokkenene.

Etter reformasjonen har protestantiske

kyrkjer gjerne forklart meiningsa i dei tre ganger tre slaga som ei bøn til og ei på-minning om treeininga, Faderen, Sonen og Anden. Og fordi kvar av dei har tre slag, har nokon laga denne tolkinga: Tre slag for Faderen tyder: skapar, styrar, oppretthalda. Tre slag for Sonen betyr: Frelsar, forsonar, etterloysar. Tre slag for Anden betyr talmann, trøystar og vegleiar. Vi har noko å tenke på i bøn medan dei ni slaga lyder!

Kjelde: Vårt Land (Ragnhild Aadland Hoen) og kirken.no

## Blad i retur - har du fått ny adresse eller postnummer?

Denne gongen har vi fått fem blad i retur fordi posten har gjort adressene meir nøyaktige. Det er nok om eit postnummer er endra frå 6800 til 6812 (Førde), så kjem bladet i retur med melding om ukjend adresse - same om bladet har gått til den gamle adressa i årevis.

Derfor må de vere flinke og melde tilbake hit om den minste endring i dykkar adresse - namn, gatenummer eller postnummer, eller om du har flytta til ny adresse. Send melding til harald.ask@eninvest.net, så skal vi føre på den nye adressa. Du kan også sende SMS til 97 02 49 15.

# Dei gode bruene

AV GUNN HOLE

**M**ed fjellsko på beina trakkar vi lett over stein-heller liggande som bruver over elvane vi kryssar. Desse bruene er like enkle som kjærkomme, og tanken slår oss at akkurat slik bygde også dei aller første menneska her nord. Ein annan dag susar vi av garde i bilen og kan gle oss over eldre og nye bruver som tek oss kjapt vidare over ein fjord eller ei brei elv. Og sjølv sagt ser vi fram til å finne brubyggjarar i full sving med å bygge eit moderne brusamband mellom Anda og Lote, når den tid måtte komme.

Bruer gjer vegen kortare mellom både folk og stadar, og kommunikasjonen vert smidigare. Dei er viktige.

Slik er det også med dei gode sosiale bruene som vert bygde mellom menneske. Her i Gloppen er ordet «trivsel» blitt løfta til nye høgder dei siste åra, tenk berre på Trivselsskogen og alt som er utvikla der. For å skape trivsel trengst det tillit, gode relasjonar og lett kommunikasjon. Då kan kreativiteten slå ut i full blomst.

I kyrkja vår vert det også lagt stor vekt på at folk skal ha det rikt og meiningsfullt saman. Soknemård for Gloppen kyrkjelyd sine mål er å UTVikle eit godt fellesskap, å UTruste til tru og teneste og å UTsende, gje vidare evangeliet om Guds kjærleik. Det er fantastisk fine målsetjingar.

Det er også ei anna side som bør nemnast. Det har knaka i samanføyingane til Den norske kyrkja i dei siste åra. Særleg har vedtaket om vigsel av likekjønna skapt diskusjonar. Mange stiller seg heilt uforståande til at kyrkja si lære om Guds gode skaparordning, kunne forandrast gjennom eit vedtak. Andre ser endringa som eit



framsteg og hevdar at også kyrkja bør oppdatere seg og vere i samsvar med det som rører seg i tida. Reaksjonane har vore sterke og diskusjonane har gått høgt i mange fora. Nokre har meldt seg ut, andre etablerer sine eigne andelege fellesskap, men det store fleirtalet av medlemmer er blitt verande i kyrkja.

Vi menneske knyter oss gjerne til meinings- og trus-felleskap med andre, og særleg i bryntingstider kan det skje oppsplitting i nye grupperingar. Vi er heldigvis i vår fulle rett til å gjere dette, sjølv om det var ønskeleg at vi stod saman som ei eining. Det som er viktig å unngå, er at det vert «vi» og «dei». Tanken om at «vi» har rett, og «dei» tek feil, ligg snublante nær for nokon kvar av oss, men fører mest berre til avstand. Å kunne inkludere, samarbeide og ta vare på kvarandre, trass i noko ulike tolkingar av Skrifta, er ein meir fruktbar og kjærlegare ståstad.

Skal vi få til trivsel og vekst i ei tid med ulike synspunkt, trengst det at vi bygger bruver og at vi møter kvar-

andre med stor velvilje. I bygdene våre er det fleire levande kristne trussamfunn i tillegg til den norske kyrkja, dei fleste godt etablerte, men vi har også ein heller ny migrantkyrkjelyd skipa av flyktningar. Meir samarbeid med dei ulike gruppene hadde vore ein rikdom og styrke. Kunne vi for eksempel møtast til fellessamlingar, vil kjennskap og forståing finne betre grobotn. Vi kan i større grad opne for nye tradisjonar og uttrykk, og nytte kvarandre sine talent. Løftar vi blikket litt forbi vår eigen kjende tradisjon, ser vi klart at vi som er kristne, uansett tilhørsle, deler det aller viktigaste: Trua på Jesus som vår Frelsar. Det er bru som held.



Foto: Gunn Hole

# Humla og blomen

## Vern om skaparverket

TEKST: GUNN HOLE

**D**et er vår, og vi gler oss over den nydelege naturen som vaknar til liv igjen. Insekta surrar, det spiser og gror, nett slik det skal på denne tida av året. Med fire årstider har vi stor variasjon og høve til å leve med i naturen på svært varierte måtar. Her i Gloppen er vi privilegerete med gode forhold både til matdyrkning og til friluftsliv, og begge deler er høgt verdsette. Men tek vi rein og frisk natur for gitt?

Klimaendringane er reelle nok mange stader i verda, og denne verda er vi ein del av. Kloden blir varmare og skaparverket er trua. Forskarane slår fast at problema kjem av levemåten vår, og minner oss om at vi må skifte kurs på mange område.

Miljø- og klimautfordringane i verda an- går sjølvsagt kyrkja. Å vere etterfølgjarar av Jesus inneber også å vere gode forvalterar

av skaparverket og kjempe for ei rettferdig fordeling av ressursane. Vern om skaparverket famnar om alt Gud har skapt, jorda med plantar, dyr og menneske, havet og lufta og heile det økologiske samspelet. 1. Kor.10, 26: "For jorda og alt som fyller den, høyrer Herren til."

Den norske kyrkja har si eiga klimamelding, ho samarbeider med andre organisasjoner og vil vere med å ta sin del av ansvaret for å verne om skaparverket. Her er det naturleg å nemne konseptet «Grøn kyrkje» der fokusset ligg på kva kyrkjelyden kan gjere av praktiske miljøtiltak.

Stadig fleire kyrkjelydar kjem med i dette arbeidet. Ein kan velje ulike lavterskelt tiltak

som kan innlemmast i alt frå gudstenestene, trusopplæringa og kyrkekaffien til vedlikehald, innkjøp og reinhald.

Vi må tenkje globalt og ta grep lokalt! Å endre tankar og vanar tek tid, men mange er inne i denne viktige prosessen.

Vi har stilt eit par spørsmål til tre gode glopparar om dette viktige temaet:

1) Korleis kan vi som kyrkjelyd vere gode forvaltarar av skaparverket?

2) Kva legg du sjølv mest vekt på i din kvardag?



**Julie Hauge Hjelmeset**

1) Rundt oss har vi ein fantastisk natur som vi alle har eit ansvar for å ta vare på. Alt i skaparverket er avhengig av kvarandre for å fungere optimalt. Skal ein

klare å ta vare på alle goda vi har fått tildekt, treng vi å stå saman. Her har vi ein stor jobb å gjere med omsyn til all forsøplinga av skaparverket, for å skape ei framtid for våre barn.

2) I kvardagen er eg opptatt av kjeldesortering og gjenbruk av f.eks. kle, møblar og liknande. På turar i skog og fjære plukkar eg med meg boss av ulikt slag som dukkar opp på min veg.

#### **Paul Rune Daviknes**

1) Vi har behov for ei forkynning i kyrkja som utfordrar oss og gjer oss urolege og samtidig lagar perspektiv på at eg kan gjere ein forskjell. Utfordrande forvaltningsforkynning, ofring til ein miljøvernorganisasjon med påfølgjande idedugnad, ville kanskje sette kyrkja i Gloppe på kartet som miljøaktiv. VI er eit stort ord som lett kan føre til at eg legg ansvaret for forvaltning av skaparverket på andre, i denne samanheng: Presten, kyrkjeverja, soknerådet og andre som har sitt arbeid i kyrkja. Skal vi som kyrkjelyd bli gode forvaltarar, må eg vere med.

2) I kvardagen er eg oppteken av at eg sjølv og borna mine skal kunne kjenne at vi gjer ein forskjell i kampen mot forsøpling og forureining der vi er. Når mange gjer små handlingar kan det føre til store ting. "Plogging" som er det nye moteordet, har eg drive med i mange år (å plukke søppel når ein er ute og går eller trenar). Så prøvar eg å vere støttande, legge til rette og vere lojal mot dei som ynskjer å vere gode forvaltarar av miljøet og kloden vår.

#### **Gunvor Sunde**

1) Som kyrkjelyd kan vi verne om skaparverket ved å dele den gode bodskapen og synne nestekjærleik i inkluderande fellesskap. Vi må leve slik at jorda også i framtida kan vere ein god heim for menneske og artsmangfald, der vi deler på goder og kjempar for rettferd.

2) I kvardagen min legg eg mest vekt på å vere eit godt medmenneske, i familie, jobb og fritid og kjempe for fridom og likskap. Eg vil vere så sjølvforsynt som eg kan, ved å dyrke mat, vere nøktern i innkjøp og forbruk, og å sjå på nødvendig avfall som ein ressurs ved å kjeldesortere.



Vil du, eller kjenner du nokon som vil vere leiar på konfirmantleir, nattcup, lys vaken, klubb, tensing sommarleir eller andre arrangement? Eller vil du berre bli betre kjend med deg sjølv og trua di?

Då er dette kurset for deg! Til haussten kører vi i gang eit leiarkurs der du vert betre kjend med deg sjølv, med Jesus, med det å vere ein god leiar og om å samarbeide med andre.

Kurset vil ha fem samlingar og ein hyttetur på vinteren. Vi kjem til å

gå igjennom ulike tema på dei ulike samlingane. Gjennom heile kurset vil det vere fokus på å bli tryggare i trua og tryggare som leiar. Ei samling vil innehalde både leik, undervisning, bøn, mat og gode samtaler!

Ta kontakt med kyrkjelydspedagog Lars-Bjarte Osland 990 03 077 for meir informasjon! Leiar for kurset blir m.a. Guro Aunevik. Kurset blir arrangert av Trusopplæringa i Gloppe og kostar 300 kr. Summen dekker hyttetur og eventuelt deltaking på leiarar og andre arrangement.

## **Leiarkurs for ungdom 15-17 år**

## **Vi feirar gudsteneste med Jesus i sentrum**

Presentert av Sigurd Vengen under medliturgsamlinga i Sandane kyrkje 4.4.18.

- fordi Gud kallar på oss og kallar oss saman, og vi kan øve oss i å kalle på Guds namn
- for å møte Gud, og møte medmenneske i fellesskap for Guds ansikt, og slik bli det vi er
- for å møte den oppstadne Jesus Kristus, slik han har lova
- for å ære Gud og gjøre Guds ære større her vi bur
- for å bli tente av Gud, gjenreiste som Guds tenarar, og slik fullføre vårt livs mål: å tene Gud (Gudsteneste = Gud tener oss og vi tener Gud)
- for å lovprise Gud saman med en-

glane, skaparverket og Guds kyrkjelyd i himmelen og på jorda

- for å førebu oss på, og bli førebudd til, den evige himmelfesten
- for å føregripe den evige himmelfesten, alt no her i tida
- for å forkynne den glade bodskapen til alle menneske og vere delaktig i Guds misjon

Vår visjon er å feire gudsteneste med Jesus Kristus i sentrum av og saman med dei som kjem til kyrkje, og for heile kyrkjelyden med ei opa dør for ei kvar sokjande sjel. Fordi «Kristus er oppstaden, lovsyng Gud i hans heilagdom», slik det står på kyrkje-klokka i Vereide kyrkje.





Både Ingebjørg og Magne var aktive på bedehuset på Sandane. Då bedehuset feira 90-årsjubileum i 2013 var kyrkjebladet på besøk i heimen deira på Øyrane. Dette biletet er frå den gongen.

# Magne Tennebø Veteranen med eit stort hjerte for song og musikk og ei trygg tru på Gud

TEKST OG FOTO: HARALD ASKE

**Magne Tennebø kom saman med Ingebjørg til Sandane for om lag 70 år sidan. Vegen gjekk frå Måløy til Oslo og vidare til Sandane der han fekk arbeid på Evebøfoss, O.K. Henden og Firdaheimen, men han engasjerte seg også i arbeidet på bedehuset og i songkor, og mange vil hugse han for den lyse, fine tenorstemma han hadde.**

Magne er fødd i Måløy i ein syskenflokk på fire der han var nummer to i rekka. Det er ikkje ofte ein kan skrive ein slik dato, men

han er fødd 18.07.1921 og vert 97 år til sommaren. Kyrkjebladet har tidlegare vore i heimen på Øyrane og snakka med han og kona

om Sandane bedehus sitt 90-årsjubileum i 2013, men no er kona borte, og sjølv har han flytta på hybel på Gloppen Omsorgssenter.

Han gjekk på Skram skole i Måløy, og prøvde seg i arbeidslivet i ei forretning i nabologet, Midtgård. Ei tid reiste han rundt i Måløy og selde eit kristent Folkeblad.

### Song og musikk i heimen

Far til Magne dirigerte to kor, eit blandakor og eit mannskor, og fekk i tillegg spørsmål om å dirigere eit kor i Holvik. – Far spelte fiolin, og eg fekk også lære å spele fiolin, noko eg fekk nytte av då eg seinare kom til Staffeldsgate i Oslo. Der fekk eg også lære å spele cello, og det var mykje song og musikk medan vi var i Oslo. Dessutan fekk eg lære å spele på sag. Det var litt spesielt.

Vi var i Oslo under heile krigen. – Hadde du noko kontakt med det som skjedde under krigen? – Ja, vi ordna nokre rom til folk i Heimefronten. Dei hadde sine kontor i IMI-hotellet, og når dei hadde sine møte, gjekk der vakter rundt heile kvartalet medan møtet varte. Eg spurde ein gong: Kvar smeller det i kveld då? Ut på natta kom dei tilbake etter utført jobb på jernbanetorget.

I Oslo jobba han for det meste i resepsjonen i Staffeldsgate, og Ingebjørg var på kontoret i Lutherstiftelsens forlag. Magne trekkjer fram eit minne frå denne tida der han rett som det var møtte Ole Hallesby. – Han var veldig omgjengeleg og triveleg og kom ofte med spørsmålet: «Hvordan står det til med deg i dag da?» I heimen på Øyrane heng det eit stort maleri som dei fekk i bryllaupsgåve. Det var Hallesby som sytte for det.

### Flytte til Sandane

På ein tur til Oslo stakk fabrikkeigar Anders Hansen innom og prata med Magne. – Anders Hansen lurte på om eg kunne kome til Sandane og arbeide på kontoret til Evebøfoss. Eg vart der i 10 år, men etter kvart vart det vanskar for tekstilindustrien, og eg skifte jobb og fekk arbeid hjå Olav K. Henden.

Kyrkjebladet kjenner til at fleire av dei andre tilsette der la merke til denne mannen som gjekk rundt på lageret og stemde i ein song rett som det var. Og for ei stemme! Maken til lys og fin tenor hadde dei færraste høyrte. Ja, slik gjekk gjetordet om songaren Magne.

– Tida på O.K. Henden var ei triveleg og interessant tid. Oppgåva var å få orden på eit rom med reservedeler. Det var viktig å få system på ting. Eg trur O.K. var tilfreds med det vi fekk til.

På Firdaheimen var der utbygging på gang, og Magne fekk spørsmål om å vere leiar for drifta og styre rekneskapen der. – Det var mykje styr! Det vart viktig å finne folk ein kunne stole på og kunne gjere jobben på ein god måte.



Magne Tennebø har flyttet på hybel på Gloppen Omsorgssenter



Ved sida av senga heng eit fint bilet av Ingebjørg og Magne. Dei fekk dele livet frå dei møttest i Oslo og til ho døydde for få år sidan.

### Heim og familie

Etter ei tid på Sandane fekk dei bygt seg hus på Øyrane – ein lun og god plass opp under hammaren. Dei fekk tre born – to gutter og ei jente.

### Med i fleire songkor

– Men det var vel ikkje berre arbeid du interesserte deg for? Du har ei Gudstru. – Ja, eg vart med i Jubilo etter at vi kom til Sandane og var med der så lenge koret eksisterte.

Trur mange av oss opplevde det som ein åndeleg heim. Vi song i kyrkje og bedehus. Det var John Hauge som dirigerte koret det meste av tida, og han var flink til å plassere medlemene på dei rette stemmene. Eg song tenor. Målsetjinga for koret var å formidle den kristne bodskapen. Her kan Kb sin utsende smette inn ei oppleveling av Magne som solist. Jubilo hadde Alnes sin Julemotett på



repertoaret mange gonger. Då Magne vart med i koret, var det sjølvsagt at han skulle synge solopartiet: «Og se, en Herrens engel sto for dem, og Herrens herlighet lyste om dem. Og de ble meget forferdede. Men engelen sagde til dem: Forferdes ikke! For se, jeg forkynner eder en stor glede som skal vederfares alt folket: Eder er i dag en Frelser født, Kristus, Herren i Davids stad.» Dette kan stå som ei oppsummering for det Magne og Jubilo ville formidle.

– Men du fekk også nokre år i Vereide kyrkjekor? – Ja, då det vart slutt for Jubilo vart eg med i kyrkjekoret nokre år – på tenoren. I tillegg til dette fann Magne sin plass i Nordfjord kristelige mannskor, og mange fekk oppleve han saman med Sigurd Berstad i nydelege duettar.

#### Med Bibelen på nattbordet

– Eg ser du har Bibelen liggande framme på nattbordet. – Det er fast kost både morgon

og kveld. At Den hellige skrift ligg framme slik kan vere eit vitnemål om kor eg står. Trua har vore med meg heile livet. Eg vart med i Indremisjonen i Måløy og song i blandakoret der. Rett som det er dukkar det opp strofer frå songar vi har vore med på.

– Om du til slutt skulle ta fram eit bibelvers som er viktig for deg. Kva ville du finne fram då? Han tenkjer seg om nokre sekund, og så kjem det: «Salige er de som tar sin tilflukt til Herren».



Songkoret Jubilo i Vereide kyrkje. Magne Tennebø var med i fleire kor, men det var Jubilo han var lengst med i. Koret vart stifta i 1932 av Kristianne Lotsberg med Olav Mo som dirigent og fungerte på mange måtar som eit kyrkjekor. Dei feira både 50- og 60-årsjubileum før koret la inn årane.

Framme frå v. Ida Eikenes, Gudrun Rinde, Liv Fure, dirigent John Hauge, Elfrid Vereide, Reidun Tisthamar, Pernela Eide.

2. rekkja: Inga Margrete Tystad, Synnøve Bolseth, Jenny Slyngstadli, Karoline Gløppestad, Klara Vattøy, Maria Aske Årskog, Signy Austrheim, Maria Skrivervik, Jorunn Sande.

3. og 4. rekkja: Bertel Austrheim, Knut Rinde, Sigfred Grimsbø, Dagfinn Aasen, Samson Skrivervik, Jakob Gimmestad, Melvin Vattøy, Magne Tennebø, John Austrheim, Kåre Bakketun, Bjarne Tystad, Rolf Baadstø.

# «Gjesteutstilla» på gallerikvelden Vil syne det ho ser, i skaparverket og i sitt indre

TEKST OG FOTO: ODDVAR ALMENNING

**R**eidun Hjartholm er frå Gulen, men bur i Knarvik. På gallerikvelden i Vereide sist palmesøndag viste ho nokre få biletet. Ho fortalte og om korleis ho tenker og arbeider, og vi gjev gjerne att noko av det her i bladet. Ho kjenner Kari Gåsemyr, og dei deler både interessa for kunst og trua på Kristus. – Det var Kari som

utfordra meg til å stille ut, og eg syner gjerne noko av det eg har, sjølv om det no vart litt kort frist.

Mellom vakre motiv av landskap og dyr, finst det eit blått hjarte som treng ei forklaring. Reidun fortel: – Dette biletet kom til meg ein kveld eg var i bøn for ein kjenning som var alvorleg sjuk. Eg var redd vi skulle

– Dei andre motiva dine er ikkje spesielt «kristne»?

– Eg trur at alt er skapt av Gud, og det er skaparverket eg er oppteken av å syne. Vakker natur gjennom skiftande årstider og lys gjev meg mykje. Eg ser og studerer og opplever, og er mykje oppteken av detaljar og av liv. Har du sett sauene og lamma om våren når dei slepp ut på grønt gras?

– Er du kunstnar på heiltid?

– Eg er utdanna sjukepleiar med vidareutdanning i familieterapi, og arbeider innanfor psykiatrien. Men eg har teikna heile livet, og har vore ein truande heile livet. Å lage bilde betyr mykje for meg. Bilda og musikken er viktige i mitt liv! Som barn lært eg å spele piano, og etter at eg blei voksen gjekk eg over på fiolin, for det er det instrumentet eg eigentleg hadde lyst å spele.

– Er du ein aktiv utstiller?

– Eg har ikkje hatt tid til det. Når eg får spørsmål som no, kan eg ha med nokre bilde her eller der. Men ei separatutstilling har eg arrangert sjølv. Eg hadde gått og tenkt at eg burde ha fått til ei utstilling før eg blei førti. Så kom det året då både mannen min og eg fylte førti, og så slo vi saman feiringane våre. Eg er frå Hjartholm i Gulen, og vi feira med ei utstilling med konsert i skulehuskjellaren på Takle. Eg har vene som spelar ulike instrument, og vi fekk sett saman eit orkester. Det blei ein times konsert med musikk eg er glad i, mykje irsk folkemusikk. Etterpå var det kunstutstilling og feiring!

Samtalen mellom kyrkjebladet og Reidun Hjartholm dreia seg òg om å sjå, og om meir måletekniske ting som vi ikkje tek med meir av her, men takkar for det vi fekk sjå!




Reidun Hjartholm stilte ut på galleriet.



Måla i tru. «Det blå hjertet» er 40 x 50 cm, måla i olje på linlerret. Det har si eiga forklaring.

misste han, og eg bad om at han måtte få møte Jesus. Då såg eg dette hjartet med jarnband rundt. Det dreiv på ope hav. Så kom dette frøet dalande ned og sette seg på hjartet, og det skein og stråla inn i hjartet. Då fekk eg ro og eg blei trygg. Seinare fekk eg vite at han levde og var komen til tru. Utan Kristus er vi bundne i lekkjer og jarn. I Kristus er vi fri.





Lovsangsbandet i seriøs, frydefull utfalding. Geir Eikenes på saxofon, Fritz Schjølberg, gitar, Jakob Leif Kroken, bass, leia av Morten Leirgul ved pianoet.

# Palmesving med Hosianna i Sandane kyrkje

TEKST OG FOTO: ODDVAR ALMENNING

Festgudsteneste med Hosianna-prosesjon, barnedåp, seksåringar, lovongsgruppa i spirituell utfalding, ei «preike» som vil bli hugsa lenge, og bålkos og pølser i brød til alle som ville ha etterpå, innlei påskefeiringa i Gloppen sokn.

**V**i visste ikkje kva vi gjekk til, sjølv om vi hadde lese annonseringa rett. Vi kom litt seint og måtte verkeleg leite etter plass. Sjeldan har det vore så fullt i Sandane kyrkje. Seksåringane i Gloppen sokn skulle få boka si, som ein del av trusopplæringa, så mange av dei frammøtte var særskilt innbedne, sjølv sagt. Vi får opplyst at 24 av 25 var med og fekk bok og deltok i pal-

mesving-inntoget.

At lovongsgruppa er med, er aldri noko minus! Vi får ei ekstra songstund før gudstesta tek til, alltid med eit interessant utval av songar; nokre gamle og kjende, nokre nye og kjende, nokre nye og ukjende, nokre på nynorsk og nokre på utanlandsk. Men alltid er dei utplukka i kjærleik til innhaldet og med trua på Ordet og trua på oss som syng!

Og musikken er langt meir enn «tonefylgje». Det vesle ensemblet er ein gjeng kunstnarar som løfter melodiane til nye kvalitetar gjennom variasjon i toneart, originale akkordgangar og interessante og brillante soloraid der han med saxofonen er først blant like-menn. Ein fryd og ei glede for sjel og ånd, og somme tider for lekamen, med!

Likevel var det preika som var høgde-



*Utdelinga av bøker var nettopp så sjærmerande kaotisk som det kan sjå ut her. Takke med handa? Kva for ei?*

*Ingrid fortalte om Ruben, onkel Aron og Jesus.  
Litt av ei preike! Og heile preika!*

punktet. Ingrid Bjørnereim, den eine av kyrkjelydspedagogane våre, tok oss med til Jerusalem den første palmesøndagen. Ruben, ein jamaldra med dei som skulle få bok denne dagen, fekk følgje onkel Aron gjennom byen til tempelet. Gjennom Ruben sine auge fekk vi sjå, høyre, lukte det yrande folkelivet, det svære tempelet, alle lydane , Hosanna-ropa, Jesus på eselfolen og i tempelet og alt som hende. Det var så levande skildra og så engasjert framført at sjølv vi som «veit alt», blei fanga og rivne med i spennande opplevingar, og fekk nye tankar til mat for trua og snop for tanken. Etterpå fekk vi vite at Ingrid hadde dikta det sjølv. Sjølv om det er tufta på forteljinga i Bibelen, skal det både solide historiske kunnskapar og ikkje liten teologisk innsikt til for å smi saman ei slik forteljing og gje ei slik framføring.

Så er det vår von at mødre og fedre som hørde på, tok med seg ein inspirasjon til å lese og fortelje meir om Jesus til kvardags i heimen, så dåpsopplæringa blir ei samanhengande gjerning, og ikkje berre eit punkt for året eller sjeldnare.





Vereide kyrkjekor pluss Bremanger kammerkor er sant og visst ei god blanding. Det var ei fin koroppleving å høyre dei, og ein må mistenke dei for å ha øvt, ikkje berre på kvar sine stemmer, men på å synge i lag. Ei god støtte for allsongen, var dei òg.

# Salmekveld med dimensjonar

TEKST ODDVAR ALMENNING  
FOTO GUNN HOLE

Med diktaren Eivind Skeie på besøk, og med eit nyfriska kor, fekk ein songglad kyrkjelyd oppleve ein salmekveld med djupne og høgde, nærleik og breidde. Høgstemte festsalmar, enkle barnesongar, salmar om sorg og salmar i jubel, alt fekk vi med, sjølv om alle tekstar heile kvelden er skrivne av ein mann, Eivind Skeie.

**V**ereide kyrkjekor hadde slege seg saman med Bremanger kammerkor, leia av organist Jarle Grotle, og det var ei svært vellukka blanding. Koret hadde både fylde i det djupe og glans på toppane, og det var ei fryd å høyre dei. At Håvard Nordvik var med på trompet, gav eit ekstra løft til fel-

les salmesong. Kyrkja var ikkje fullsett, men godt over hundre menneske fekk oppleve ein rik kveld, både tekstleg og musikalsk.

## Eivind Skeie

Skeie har skrive ei mengde salmar, så mange at han i 2007 samla 316 salmar i ei bok

som fekk namnet 316! I Norsk salmebok har han 38 salmar som han har dikta sjølv, og 17 som han har omsett frå andre språk. Han har dessutan skrive fleire bøker, og han står bak tekstar til TV-produksjonar. Han har samarbeidd med fleire komponistar, og har såleis vore ein sentral person i norsk kyr-



Eivind Skeie møtte mange «gode ansikter» då han opna salmekvelden i Vereide kyrkje. Godt over hundre menneske gjekk rike heim etter allsongstunda.

kjeliv i ein mannsalder! Han er fødd i 1947, tok prestetudning og har vore prest i den norske kyrkja før han blei diktar på heiltid. I 1972, 25 år gammal skreiv han den første salmen av dei som er med i salmeboka. Dei andre salmane spreier seg utover i heile salmeboka, det viser at han skriv om alle tider og alt som skjer i kyrkjeåret. Dei er og spreidde over tid. Han har vore produktiv heile livet, også etter at han nådde pensjonsalderen.

### Mykle brukte salmar

Mange av salmane har blitt «folkeeige» langt utom kyrkjeveggene. Tenk berre på «Tenn lys, et lys skal brenne», «En krybbe var vuggen» og «Visst skal våren komme» med alle sine flotte tekstar! Til gudstenestelege bruk har han tekstar til dei fleste anledningar spreidd over heile kyrkjeåret. Han er mellom dei som vert brukt mest i kyrkja, vil vi



tru! På salmekvelden introduserte Skeie alle salmane, dei vi song saman alle, og dei koret song åleine. Om teksten er kjend, gjev det auka forståing og ny innsikt når diktaren forklarer korleis salmen blei til, og kva som var poenget å få fram. Og er teksten ny, er det ikkje mindre viktig å få ei god innføring i tankane bak formuleringane. Og alt dette gjekk i oppfylling denne kvelden. Eivind Skeie har heile tida vore «moderne» ved å vere til stades i livet i kyrkja og blant «folk flest», og innhaldet i salmane rører ved både

kjensler, intellekt og tru. Ti salmar var oppsette på programmet. Nokre var kjende og andre hadde kanskje nokon ikkje hørt før.

### Rikt salmeval

Kvelden starta med salmen til reformasjonsjubileet i 2017, bestilt av Bjørgvin bispedøme: «Stig frem, Guds folk på tids torg», og Skeie forklarte godt korleis teksten gjer Luthers idear til aktuelt og tidsriktig gods i vår tid. Mennesket er skapt i Guds bilde. Englane hadde ikkje noko bilde av Gud



Eivind Skeie er ein dyktig og levande formidlar, og han sa at det var mange «gode ansikter» å sjå i Vereideskyrkja.

før dei såg mennesket som Gud skapte! (v 3) Gud steig ned til mennesket, og vi må difor stå fram i vår tid og forkynne gleda! Ved å forklare og kommentere, gjerne med anekdoter om eigne opplevingar eller samliv eller møte med diverse komponistar, leia han oss med klokskap og fin humor frå salme til salme. Ein kunne tenke at ein slik kveld skulle bli ei oppleving av «kom og sjå kor flink eg er». Men det slapp vi heilt. Rett nok sa Skeie i starten at han har eit språkleg handicap: Alt han skriv er på bokmål! Å kome her til nynorskland med berre bokmål, kan kanskje opplevast som «tungetale», men i ein kristeleg samanheng er det kanskje ikkje heilt framandt! Men alt han sa bar preg av djup innsikt i det menneskelege, nærleik til

folk, omsorg for den einskilde, og ønskje om å formidle Kristi kjærleik til si samtid. Oppbyggeleg, med andre ord.

### **Flott avslutning**

Høgdepunkta kom på rekke og rad. Opningssalmen hadde eit flott arrangement med orgel og trompet i utfalding attått eit velklingande kor frå galleriet. Seinare kom koret fram i kordøra, og leia oss derifrå gjennom også dei meir ukjende melodiane. Ti salmar var oppsette på programmet, og endå fekk vi eit par til, og Skeie sjølv song solo på nokre av dei. Om koret var ei oppleving, var sanneleg Skeie si kraftfulle og velklingande røyst også ei positiv overrasking for mange. Mange vil vite at Ludwig van Beethoven sin

store og verdiskjende niande symfoni har «Ode til glede» som avslutning, sunge av solistar og kor, med ein mektig melodi som er av det mest høgstemte i musikkarven gjennom tidene. Eivind Skeie sa at det hadde vore eit komitemøte der Beethoven, Henry van Dyke og Eivind Skeie deltok, der konklusjonen var at Skeie kunne få skrive ein salmetekst til melodien.

Kvelden slutta så med at vi song denne salmen, nr. 320 i Norsk salmebok, skriven i 1997:

*Ærens konge, nådens Herre, glade vil vi prise deg.  
Våre hjerter er lik blomster som mot solen åpner seg.  
Fjern hver sky av synd og mørke og la twilen drive bort.  
Gi oss sol og evig glede på den dag som du har gjort.*



## Pasjonstid i vårt århundre

Desse klippa er henta frå Kari Fure si bok: *Flukten fra Syria og Irak*. Lunde forlag 2015.

Påskeuka faller på de siste dagene i mars 2005. Til tross for urolighetene, er det fremdeles et optimistisk budskap som forkynnes i de kaldeiske kirkene i byen.(Mosul)

«2004 var vårt Golgata med lidelse og ødeleggelse, men vi har ikke mistet gnisten. Vi har ikke flyktet, vi er fremdeles her, fordi vi er sikre på oppstandelsen», sier Rangheed Ganni, prest i Den hellig ånds kirke i Mosul.

Den kaldeiske erkebiskopen, Paulos Faraj Rahho, taler denne påsken om meningen med oppstanden: «Likvideringer, terror og frykt skal ikke få det siste ordet i Irak. Slik Jesus seiret over graven og døden, skal livet og kjærligheten seire til slutt.»

Folk strømmer til kirkene. Ganni tror det må ha vært minst 1200 på langfreddagsgudstjenesten i kirken hans. Det er så fullt at mange må stå. På forhånd har kirkene blitt oppfordret til å gjøre påskens gudstjenester korte, fordi man var redde for nye angrep, men prestene føler seg nærmest tvunget til å holde på

like lenge som vanlig, fordi så mange har trosset frykten og møtt opp.

---

I den neste melding som kommer fra presten i Mosul til AsiaNews, i april 2006, var han tydelig urolig. Det er kommet en ny politistasjon like ved kirken hans. I de fleste land ville det bety at kirken ble tryggere, men i Irak er det det motsatte. Både kirker og politistasjoner er terrormål. Landet er kastet ut i en voldsspiral uten like. Men til tross for daglige eksplosjoner og drap, har menigheten i Mosul igjen feiret påske.

«På langfredag våknet byen av en massiv eksplosjon. En bilbombe gikk av nær en politistasjon. Seks mennesker ble drept og flere titalls ble såret. En annen bombe gikk av i den gaten som leder inn til Den hellige ånds kirke.»

Likevel var kirkene fullpakket med folk.

«Faktisk enda fler enn året før», forteller han.

-----

Ragheed Gannis rapporter fra AsiaNews kommer sjeldnere, men under påskefeiringen året etter (2007) hører vi om ham igjen. Menigheten hans går inn i den stille uka til lyden av skuddsalver.

Gudstjenestene blir holdt i kjelleren av hensyn til sikkerheten. Alle vinduene i kirken er blåst ut av bomber som har eksplodert i nærheten, men de har gitt opp å reparere dem, for de vet at rutene snart kommer til å bli knust igjen. Likevel kommer folk til kirken. De kommer selv om de vet at det kan være det siste de gjør.

Palmesøndag går tre bilbomber av i nærheten. Til tross for dette kommer 250 mennesker til gudstjeneste. Like før de skal til å lese fra Skriften, ble politistasjonen som ligger vegg i vegg, angrepet.

«Kulene suste over alt, men vi holt oss rolige. Fader Ragheed trøstet oss og oppfordret oss til å sette vår lit til Gud,» sier en kilde til AsiaNews.

«Der og da følte vi oss som Jesus da han red inn i Jerusalem og visste at korset ville bli konsekvensen av hans kjærlighet til menneskene,» sier Ganni. «Vi holdt vår egen lidelse frem som et bevis på vår kjærlighet til Jesus.»

Søndag 3. juni 2007 vart Rangheed Ganni, saman med tre diakonar, drepen på veg heim frå gudsteneste, 35 år gammal.



Så kom årets kaldaste vårslepp.

# Iskaldt påskeplask

TEKST OG FOTO: HARALD ASKE

**D**ei siste åra har konfirmantane fått anledning til eit bad etter gudstenesta i Vereide kyrkje 1. påskedag. I år var utfordringa større enn på lenge då det hadde vore

kuldegrader i fleire dagar. Lenger inne i Gloppefjorden låg der isskorpe fleire stader. Uff, - det kom til å bli kaldt i år!



Elias Eikenes Osland såg ut til å nyte det.



Forventningsfulle og litt spente tilskodarar.



Og returnen lét ikkje vente på seg. Dei fleste var snare opp att!

# Barnesider

VED GUNN HOLE

**I**belen kan vi lese at Gud skapte heile den fine jorda vår for lenge, lenge sidan. Han laga også den varme sola, månen og alle stjernene som ligg langt borte. Og han skapte endå mykje meir! Alle dei fine blomane og dei grøne trea, alle fiskane i havet og dyra på jorda, vart skapte av Gud. Vi må heller ikkje gløyme fuglane som flyg

oppe i lufta! Heilt til slutt vart vi menneska skapte. Gud tykte sjølv at han hadde gjort ein god jobb!


Vi må passe på slik at naturen kan vere rein og fin, og at alle dyr og folk kan få eit godt liv. Både store og små kan vere med på å ta vare på naturen og alt som lever! Vi kan for eksempel gi småfuglane mat, aldri kaste

frå oss plast i naturen, men heller ta med oss søppelet når vi er ute på tur.

På denne sida er det både fuglar, husdyr og fisk som ser ut til å ha det veldig bra. Viss du finn fram fargeblyantar og fargar teikningane, ser det endå finare ut!



## Fargelegg sommarfuglen


Sommarfuglen kan du gjere ferdig ved å streke frå prikk til prikk og fargelegge den til slutt.



## Finn 5 feil

Finn du 5 feil på strekteikninga til høgre? Fasiten står opp ned på neste side.






### Fargelegg teikninga

På denne garden var det mange dyr, men dei var litt fargelause? Kanskje du kan gjere noko med det?

### Kva blir dette?

På teikninga til høgre startar du på 1 og strekar deg vidare heilt til 46. Kva trur du det blir?



1. To prøkkes på krokodillen sin haltepipp
2. Ein tanne til krokodillen sin
3. Pimsevistet sin bekkotit
4. Koalabjørnen sitt autge
5. Luvret bak ryggen til koalabjørnen



Per Martin les opp vinnarnummera under åresalet på barneforeininga.

# Ein positiv og fornøgd konfirmant

TEKST OG FOTO: VENKE KOLBOTN

**P**er Martin Solbakk Flolo frå Breim har vore konfirmant det siste året og skal no konfirmerast i Breim kyrkje 20. mai. Han har hatt barneforeininga «Den Vesle Hjelpar» som sitt konfirmantprosjekt. På vegne av kyrkjebladet stilte Venke han nokre spørsmål om korleis han har opplevd året som konfirmant.

– Veldig fint at du har valt barneforeininga som ditt konfirmantprosjekt. Kvifor valde du barneforeininga?

– Eg valde barneforeininga fordi eg har vore med der sidan eg var liten, og så kjener eg alle som er der.

– Kva oppgåver har du hatt som konfirmant i barneforeininga siste året?

– På annakvart møte har vi eit lite åresal. Eg har ordna med gevinstar, selt årer og så har eg hatt ansvar for gjennomføring av trekking og utdeling av gevinstar.

– Du har vore med i barneforeininga i mange år. Kva gjer de på i barneforeininga og kvifor synest du det er kjekt å vere med?

– Vi samlast annankvar laurdag, frå haustferien til mai. Vi møtest i kjellaren på gamle Høygarden skule. Hovudaktiviteten er å lage gevinstar til misjonsbasaren vår som er på våren. Vi et god mat, vi syng og har opple-

sing. Og så har vi åresal, det er populært. Eitt møte i året er vi på bufellesskapet på Retunet, då har vi åresal, mat og underholdning. Ein søndag i året er vi med på misjonsgudssteneste i Breim kyrkje. Då har vi song, lesing av tekstar og kyrkjekaffi. Det er kjekt å vere med i barneforeininga fordi der er utloddning, god mat, vi lagar gevinstar, pratar og har det kjekt ilag.

– No nærmar det seg konfirmasjonen som i Breim skal vere 1. pinsedag den 20. mai. Kva har de halde på med i året som konfirmantar?

– Eg har vore med på mykje dette konfirmantåret. Vi har konfirmantimar, med breimsgruppa eller ilag med konfirmantane frå heile Gloppe. Då har vi trusopplæring og vi brukar konfirmantbibelen.

– Vi er med på minst ti gudstenester i løpet av konfirmantåret. Nokre gudstenester er obligatoriske og nokre kan vi velje sjølv. På kvar gudsteneste er det nokre konfirmanter som deltek med å lese tekstar, dele ut bøker og andre oppgåver.

- Tidleg i haust var vi på konfirmantleir på Nesholmen. Der var det mange aktivitetar å vere med på. Vi overnatta, fekk god mat, hadde seminar og deltok på gudsteneste. Det var veldig kjekt å vere på Nesholmen.

- I november var vi med på nattcup, som er i Nordfjordhallen i Måløy. Der var det konfirmantar frå heile Nordfjord. Vi hadde fotballcup, aktivitetar, konkurransar, underholdning og gudsteneste. Eg synest det var veldig kjekt å vere med på fotballcupen.

- I mars var vi med på fasteaksjonen. Då

gjekk vi rundt med innsamlingsbøsser. Alle fekk vite kvar dei skulle gå, og eg fekk rute på Byrkjelo. Då vi var ferdige, fekk vi drikke og kake.

- Kva synest du har vore bra med konfirmantåret?

- Konfirmantåret har vore sosialt, morosamt og interessant. Vi har fått vere med på mange ulike og kjekke aktivitetar og turar.

- Er det noko som du kanskje synest ikkje har vore så bra?

- Nei, eg kjem ikkje på noko som eg sy-

nest ikkje har vore bra.

- Noko meir som du vil legge til?

- Eg gledar meg veldig til konfirmasjonsdagen. Då er det høgtideleg i kyrkja og det kjem mykje familie for å vere med på festen.

Mange takk til Per Martin som ville stille opp til intervju og takk for innsatsen på barneforeininga. Kjekt å høre at konfirmantåret har gjeve mange gode opplevingar. Vi ynskjer han og alle dei andre konfirmantane i Gloppe lukke til med feiringa av konfirmasjonen!



Frå venstre: Thomas, Malene, Magnhild, Narve og Olve. Eirik og Eline er ikkje med på bildet.

# Fasteaksjon 2018 i Hyen

TEKST OG FOTO: LIV Ø. SOLHEIM

Tema for aksjonen var Kirkens Nødhjelps arbeid med vatn og sanitær i utsette område omkring i verda. Gruppeleiar og dei som følgjer konfirmantundervisninga i Hyen tok ansvar for fasteaksjonen i Hyen. Dei besøkte alle heimearne og valde å gå sundag 18.04. Mange var

på tur i finveret, men dei fekk sjansen til å gje si gáve seinare.

Ungdomane gjorde ein kjempeinnsats. Dei som hadde fått tildelt største området brukte 3-5 timer på jobben. Om kvelden samlast dei for å telje opp det som bygdefolket hadde gitt. For innsatsen fekk dei servert

pølse med brød og saft.

Kasserar i soknerådet, Narve Eimhjellen, og gruppeleiar Magnhild Solheim var med og talde opp pengane. Glade kunne dei konkludere med at dei fekk samle inn over 9 000 kr.

Vi rettar ei hjarteleg takk til ungdomane, og foreldra deira som hjelpte til med skyss.



Tørrtrenin. Instruktørane let alle bli godt kjende med fartøyet og gode reglar for bruk av åra og korleis ein skal oppføre seg i ein kajakk. Og Morten fann ut at han skulle få seg ein større kajakk.

# Konfirmantar på gyngande grunn

TEKST OG FOTO: ODDVAR ALMENNING

Morten Leirgul er ein av dei frivillige som samlar ei gruppe konfirmantar til aktivitetar og samtale. Ein gong for månaden møtest dei, og aktivitetane varierer. Vi møtte gruppa på den nest siste samlinga. Då var det padling i havkajakk som stod på aktivitetslista. Den eine av dei hadde aldri padla før, og ingen av dei driv med dette fast, så det kan hende dei var spente både leiarane og foreldra, for ikkje å seie konfirmantane sjølv!

**V**i møtte gjengen ved nausta på Øyrane, der to ivrige og kunnige padlarar var instruktørar for dei lite røynde ungdomane. Paul Rune Daviknes og Lars Bjarte Osland har padla før, og med solide instruksjonar og velvillig ro gjorde dei starten og turen til noko interessant og trygt, og likevel spennande. Alle kom seg vel av gar-

de, og alle kom velberga fram over den vesle delen av verdshavet som ligg mellom nausta på Øyrane og den «nye» Sandane-fjæra.

## Ulike aktivitetar

Vi snakka med nokre av konfirmantane i det dei kom, og dei kunne fortelje at dei har ei samling for månaden, og at det er noko nytt

kvar gong. Alle var litt spente på denne padlinga, og Emily Wilke, den eine av to jenter på gruppa, kunne fortelje at ho aldri hadde padla kajakk før. Men ho såg ikkje skremd ut for det. På spørsmål om kva dei har gjort før, kom dei fort fram til at dei hadde vore på fisketur og dei hadde hatt fottur til Haugsvarden og skitur på Kleivane. Nokon meinte



På gungande grunn. Her har dei fått vatn under kjølen, og ekspedisjonen kan starte. Det blir ikkje fortalt at nokon gjekk rundt og måtte bergast. Det låg godt til rette med flat sjø og lite båttrafikk som kunne skape bølgjer.

Ein spent gjeng konfirmantar er klare for nye opplevingar saman med Morten Leirgul. Vi ser frå venstre: Håkon Mølmann, Elias Eikenes Osland, Matias Lothe, Emily Wilke, Berit Leirgul, Andre Aske Granheim, Kjetil Drageset Nes og Sindre Sollid

det hadde vore bordtenniskveld tidleg, og vi fekk vite at neste tur, den siste, skal vere fotur til Ryssdalshornet i mai. Vi ønskjer at dei får tøyren og god tur!

#### **Samtalen**

Kvar samling blir avslutta med ein samtale om eit tema. Denne gongen var temaet: Kven er Jesus? Det skulle vere eit høgst aktuelt tema for ein konfirmant. På spørsmålet om dette er ein vanskeleg del av opplegget, ser dei på kvarandre, men synest at det går fint, og at det ikkje er vanskeleg å engasjere seg.





Elias vann si klasse i rennet. Han susa ned bakken på 53:37 og 54:04. Samanlagt 1:47.41. Han har forøvrig no også blitt krinsmeister i super-G. Gratulerer!

# Sportsgudsteneste om fellesskap

TEKST: TORE MYKLEBUST  
FOTO: HALLSTEIN DVERGSDAL

Utvikfjellet viste seg frå si aller beste side heile denne påska. Dermed var det duka for at Even Hole cup kunne gjennomførast skjærtorsdag. Tradisjonen tru var det med innlagt sportsgudsteneste mellom omgangane i storlalåm-rennet. Då stansa også skiheisen. Stor takk til arrangørane! Speaker Anders Felde gjorde også ein stor innsats for å samle deltakarane til gudsteneste.

Ved sida av prest og organist gjorde to av


konfirmantane teneste, Håvard Hetle og Elias Helle Felde. Elias las forteljinga om Jesu siste måltid med lærersveinane.

Preika handla om fellesskap. Jesus og lærersveinane hadde nært fellesskap med kvarandre. Difor var det òg at dei feira det jødiske påskemåltidet i lag. Jesus var flink til å skape inkluderande fellesskap. Vi er også kalla til å bygge fellesskap. Enten det er i idrett, heime, eller i samfunnet og som kyrkje.



## LØYSING PÅSKEKRYSSORD

Her var det mykje som mangla! Løysingsord som vanta stikkord (beit og eg), feil form på stikkordet (skiparane blir arangørar), feilplassert stikkord (gudinne burde stå ei rute lengre nede), men først og mest var det tjukke linjer (stoppstrek) som mangla. Vi vonar du kunne sjå at det var latterleg dårleg og fekk deg ein god flir før du la vekk bladet! Vi har teke opp saka med han som har laga kryssordet, og han har lova å ikkje levere fleire. Redaktøren.





## 26.-30. juni

# KRIK ACTION

### HVA ER ACTION?

KRIK ACTION er kort oppsummert den BESTE måten å starte sommerferien på! Sammen møtes vi til leirliv, aktivitet og fellesskap på Bø camping (Telemark) - med Jesus i et naturlig sentrum. Som en real bonus er også Skandinavias største vannpark, Bø Sommarland, nærmeste nabo.

En vanlig dag på leir starter med et morgenmøte i møteteltet. Der samles vi til leirsang, lovsang, tale og litt praktisk informasjon, før vi sammen drar ut på aktivitet.

Ved påmelding velger du en aktivitet eller idrett du ønsker å få instruksjon i. Denne holder du på med på dagtid (onsdag, torsdag og fredag) fra ca kl. 10.00-14.00.

Når du kommer hjem er middagen servert på leirplassen, og så er det opp til deg hvordan du vil bruke de neste timene. Kanskje løpe rett opp i badeland? Eller kanskje bare henge på leirplassen? Valget er ditt!

Når klokka blir 19.30 møtes vi i møteteltet igjen for mer input og fellesskap. Etter møtet skjer det mye moro på miljøtorget rett utenfor møteteltet.

Kvelden avsluttes med noe vi kaller

"telgrupper" - der du får besøk av et par ledere på kveldstid. Disse gruppene er for mange et høydepunkt i løpet av dagen og leiren.

### ALDERSGRENSE

Leiren er for deg som er 14 år eller eldre (du må fylle 14 år i løpet av 2018). Øvre aldersgrense er 17 år (du fyller 17 år i løpet av 2018).

### PRIS

Påmeldingsavgift kr 400,- betales på KRIK sine nettsider v/påmelding. (Denne refunderes ikke ved avmelding).

I tillegg til påmeldingsavgiften kommer en faktura for leiren som blir tilsendt pr post fra kr 1725,- (for medlemmer som melder seg på før 1. mai). Merk også at noen av aktivitetene koster ekstra (se aktivitetsoversikten for mer informasjon).

### INKLUDERT I PRISEN

Leiravgiften inkluderer overnatningsplass (man overnatter i eget telt, så ta med det!), middag x3 (onsdag, torsdag og fredag), inngang til Sommarland, mø-

ter, aktivitet/instruksjon, transport til og fra aktivitetar og miljøtorg.

### LOKALE LEIARAR OG TRANSPORT FRÅ GLOPPEN

Også i år reiser Arne og Margot Nesgård på KRIK Action. Dei er med på reisa, og bur også på Bø camping. Dei bur ikkje i same tunet som deltakarane, men nær nok til at ein kan nå dei om det skulle vere noko.

Innkvartering er på Bø Camping og ein overnattar i telt. Inkludert i prisen er middag, inngang til Bø Sommarland, møte, aktivitetar/instruksjon, transport til og fra aktivitetar og miljøtorg. Ein må sjølv lage til frukost.

Dersom ein vil ha transport til og frå Bø, så kan ein ta kontakt med Arne (41458803) eller Margot (40088143). Ein satsar på å få til felles transport med minibuss for deltakarar frå Gloppe.

Avreise frå Nordfjord Folkehøgskule tysdag 26. juni klokka 07.30, og ankomst Nordfjord Folkehøgskule igjen ca 18.00 laurdag 30. juni. For meir informasjon og påmelding sjekk ut [www.krik.no/action](http://www.krik.no/action).



# SPEKTER

## Europeisk Ten Sing-festival i Bærum 7.-12. august

Spekter er ein festival for ungdom, unge vaksne og konfirmantar som vert arrangert på Kvaløya i Bærum kommune 7.-12. august. Dagane er fylt av konsertar, festivalstemning, idrettsaktivitetar og turer, workshops, sol, bading, friluftsliv, seminar, kristent fellesskap, rettferdighet, dialog, vennskap, tru og kveldsmesse m.m.

Festivalen er eigd av KFUK-KFUM, men er open for alle som ynskjer å delta. I 2018 vil European Ten Sing Festival vere ein del av Spekter og vi vil få besök av ca 1000 europeiske ungdomar.

Det vert sett opp eigen buss frå Sogn og Fjordane som ein kan følgje, og ein bur saman med denne gjengen på Spek-

ter. Innkvartering er på skular. Ta kontakt med Asbjørn Gjengedal 90173631 eller Lars-Bjarte Osland for påmelding. Medlemmar av Ope Hus og Joysing får og ekstra støtte til å reise.

For meir informasjon sjekk [www.spekterfestival.no](http://www.spekterfestival.no).

## Arrangement til hausten

- 01.09.18, kl. 11:00-13:00 4-års-samling i Breim
- 02.09.18, kl. 11:00 Gudsteneste med utdeling av bok til 4-åringane
- 15.09.18, kl. 11:00-13:00 4-års-samling i Sandane kyrkje
- 16.09.18, kl. 11:00 Søndagsskulegudsteneste med utdeling av bok til 4-åringane
- 24.-25. november. Lys Vaken for 11-åringane i Vereide sokn
- 1.-2. desember. Lys vaken for 11-åringane i Breim Sokn

TRUSOPPLÆRING I GLOPPEN



◀ Påskeprosesjon i Hyen kyrkje 2. påskedag. Fremst i påskeprosesjonen går korsberar Frode Larsen. Det har han gjort i ei årrekke.

▼ Presten har delt ut 6-årsboka og 6-åringane kan stolt posere for foreldre, besteforeldre og fotografar i benkeradene.



# Påskeprosesjon og utdeling av 6-årsbok i Hyen

TEKST: TORE MYKLEBUST  
FOTO: KURT DJUPVIK

Allle dei fem 6-åringane i Hyen møtte fram andre påskedag. Saman med søsken og andre born bar dei tradisjonen tru inn påskeliljer medan vi song «Dine hender er fulle av blomar», ikkje for at det trengs blomar til grava, som det heiter

litt ut i songen, men fordi vi feirar Jesu oppstode og livet som vann over døden. Difor pynta vi og kyrkja med påskeliljer som er eit teikn på våren og nytt liv som av daude gror.

6-årsboka handlar både om påske og pinse og mange av dei kjende påskesalmane står

også der. Elles møter 6-åringane att Bo og Nora frå 4-årsboka. Bo og Nora feirar m.a. påske og dei òg ser fram til at dei snart skal begynne på skulen.



Sølvi hadde fått med seg brørne Lars Helge og Ole André.  
Dei musikkglade søskena spelar òg på fleire instrument.

# Konsert i Hyen kyrkje

# Søskentrio Hopland spreidde glede i Hyen

TEKST: EDITH AA

FOTO: OLE MATIAS AA

Sølvi Hélén Hopland er kjend for mange gjennom songen og musikken sin. Søndag 15. april var ho invitert til Hyen for å halde konsert i regi av Hyen Normisjon og Hyen sokneråd. Sølvi vaks opp i Osmundsvåg i Vågsøy, og kjem frå ein musikalsk familie. Det fekk vi glede av i Hyen, der ho stilte med to av brørne sine, Lars Helge og Ole André.

– Det vart ein utrølig variert og fin konsert, seier Olaug Aa, ei av dei 55 tilhøyrarane som hadde møtt opp. -Dei tre syskena song både solonummer, duett, og alle tre i lag, og dei trakterte ulike instrument som gitar, ukulele, trekkspeil, litt fele og tangentar. Dei fleste av songane var det Sølvi som hadde skrive både tekst og melodi til. Sølvi har opplevd mykje i livet sitt, og ho tek fram tankar om tru og

trøyst, natur og menneske, som ho formidlar med ei vakker songrøyst. Vi fekk høre mange av dei mest kjende songane hennar. No har Sølvi gitt ut ei samleplate. Den kunne ein få kjøpt etter konserten, i tillegg til fleire av dei mange CD-ane ho har fått produsert.

Til dagleg er Sølvi Hélén Hopland å finne ytst i Vågsøy kommune, der ho blant anna driv kulturkafé med høve til overnatting,

på «nedlagde» Ulvesund fyr, som ho har overteke og pussa opp. Men songen har alltid vore ein viktig del av livet hennar, og ho opptrer gjerne ein gong i blant, slik vi fekk nytte godt av i hyekyrkja denne dagen! Tusen takk til Sølvi, Lars Helge og Ole André – og alle andre som bidrog til at vi fekk ei god musikalsk oppleveling.



Sølvi har skrive både melodi og tekst til dei fleste av songane på konserten.



**Misjonsgudsteneste i Breim kyrkje 11. mars**

# Breimninggar fekk høyre om døvearbeit på Madagaskar

TEKST OG FOTO: VENKE KOLLBOTN

Soknerådet hadde særskilt invitert dei til barneforeiningane i Breim, «Den vesle hjelpar» på Høygarden og Byrkjelo barneforeining. Foreiningane er tilslutta Det Norske Misjonsselskap og samlar inn pengar til ulike misjonsprosjekt. Desse prosjekta er tilknytta undervisning og helsetiltak for barn og unge i andre land som Det Norske Misjonsselskap arbeider i. Borna gjekk i prosesjon der dei bar flagg frå ulike land både i Asia, Afrika, Sør-Amerika og Europa. Det passa difor godt med inngangssalmen «Bygge Guds rike, bygge Guds rike, bygge Guds rike her på jord, gutter kom og hjelp oss, jenter kom og hjelp oss, å bygge Guds rike her på jord.»

Borna deltok også med tekstlesing og song. Dei framførte to songar, «Alle, alle vil vi ha med» og «Gud Faders vesle barn eg er.»

Kyrkja vår har fått eit misjonsoppdrag i bibelverset som står i Matteus 28,16-20, også kalla misjonsboden: «Då steig Jesus fram og tala til dei: «Eg har fått all makt i himmelen og på jorda. Gå difor ut og gjer alle folkeslag til lærersveinar, med di de døyper dei til namnet åt Faderen og Sonen og Den Heilage Ande, og lærer dei å halda alt det som eg har bode dykk. Og sjå, eg er med dykk alle dagar så lenge verda står».»

Det var også dåp på gudstenesta og ingen ting passar vel betre enn å ha dåp på ei mi-

sjonsgudsteneste.

Toril Lange som er tidlegare misjonær i Mali, heldt preika. Ho snakka frå teksten i Johannes 3,16. «For så høgt elskar Gud verda at han gav Son sin, så kvar den som trur på han ikkje skal gå fortapt, men ha evig liv.»



Venke Kollbotn som tidlegare har vore misjonær på Madagaskar, las dette bibelverset også på gassisk.

Mision er å formidle det skrivne ordet i Bibelen. Å formidle at for Gud har alle menneske like stor verdi og at Gud elskar oss slik som vi er skapte, er noko av det viktigaste.

Å formidle Guds kjærleik til alle menneske gjennom praktisk handling har vore misjonsorganisasjonane sin måte å arbeide på i alle år. Misjonsorganisasjonane driv difor med forkynning hand i hand med hjelpe- og utviklingsarbeid innan undervisning, helse og landbruk. Mision er ein viktig del av kyrkja sitt diakonale arbeid.

Toril Lange fortalte blant anna om skulane for døve på Madagaskar som Det Norske Misjonsselskap i mange år har drive i samarbeid med Den gassiske lutherske kyrkja. På Madagaskar har det vore og er framleis i mange tillfelle slik at born som er fødde med eit eller anna handicap enten vert gjøymde heime eller i verste fall sett bort ute i skogen for å døy. Tilbod om undervisning for desse borna har gjeve mange av dei nye moglegheitar og ikkje minst gjeve dei menneskeverd.

Ingen kan hjelpe alle, men alle kan hjelpe nokon, heiter det. Barneforeiningane i Breim er gjennom sitt arbeid med på å hjelpe nokon. Ei stor takk til borna, leiarar, foreldre, besteforeldre og alle andre som på ein eller annan måte er med på dette store arbeidet.



Martin Halsbog frå Tustna. Kjøpmann, redaktør, diktar og målar.

## Fagert er Norge

AV MARTIN HALSBOG

Fagert er Norge, og fritt skal det være,  
høyreist og fritt som de mektige fjell  
der som en bauta for verden skal bære  
fedrenes ordtak til tidenes kveld.  
Gud er attåt, vi har herligste følge,  
beste beskytter, ti han er med oss,  
og over havenes blänende bølge  
seiler et Norge med flagget til topps.

Fagert er Norge, det synger i barmen,  
vekker de unge til mandigste dåd.  
Fagert er Norge, det kaller på harmen  
over hvert ussett og svikefullt råd.  
Arven er adlet og adel forplikter,  
maner til troskap i hjertenes grunn,  
roper sitt ve over nordmenn som svikter  
kallet og kravet i alvorets stund.

Fagert er Norge og fritt skal det være,  
slik som vi ser det i vårdagens grønt.  
Frihet er nordmannens odel og ære,  
blomsten i det som er fagert og skjønt.  
Bibel og grunnlov er mer enn et smykke,  
derved vi vant og skal vinne vår sjel,  
gjenreise Norge til heder og lykke.  
Signe oss, Herre, til tidenes kveld!




Foto: Gunn Hole.

## Fagert er Norge

TEKST OG FOTO: HARALD ASKE

Diktet «Fagert er Norge» til venstre, stod på trykk i Romsdalsposten etter krigen med denne opplysninga: Dette diktet ble skrevet av kjøpmann M. Halsbog d. 14. juli 1941.

I dag finn vi diktet i ei diktsamling med tittelen: «Livets store rikdom» Dikt av Martin Halsbog redigert av Ottar Roaldset. Martin Halsbog var fødd på Tustna i 1879. To uhell i barndomen gjorde at han fekk pukkelrygg og hadde därleg helse, men han var elles ein velutrusta mann som etter skulegang fekk jobb som butikkbetjent i Linvågen, starta eigen butikk, var redaktør i Nordmøre Indremisjonsblad i 19 år, styrt fattiggassa og måla bilete. Etter ei helsing i Gullsteinskyrkja kommenterte broren hans, Albert: «Martin er ikkje så dyktig til å tala, men gi'n papir og blyant». Mange av dikta vart nok brukte i Nordmøre Indremisjonsblad. Martin Halsbog er bestefar til Ingrid Halsbog Aske.

# Å tenkje på det som hende, å atteléte

AV MORTEN LEIRGUL

«Bli ny med Hjemmet» er ei spalte i vekebladet. Deltakarane kjänner på trøng til fornying anten av garderobe eller utsjånad. Eg har av mange grunnar ikkje kjent så sterkt på behov for å delta i slike spalter, eller å byte ut klede som framleis heng i hop. Men også eg har stor glede av variasjon av mange slag, både når det gjeld gjeremål, musikk og mat. «Heilt nytt» kan vere spennande, og det kan vere kjærkome, anten når det gamle er utbrukt eller når det gamle rett og slett ikkje fungerer.

Endå sterkare er behovet for nytt når ein opplever at det ikkje gjekk så godt med det ein fyrst prøvde. Har vi ikkje alle gjort noko vi så gjerne skulle ha ugjort, eller sagt noko vi ville ha usagt om vi fekk sjansen? Har vi ikkje alle noko vi angrar på? Atterlæta, kalla Ivar Aasen uttrykket som samsvarer med vårt dialektuttrykk: Atteléte eller etterléte.

Det er tungt å gå og trege på noko, og ofte vel vi strategiar som gjev oss hjelp til å vende fokus på noko anna, noko meir støyande, så vi slepp å etterléte. Refleksjon blir både brysamt og trasig; ein får minne som gjev anger og uro. Det er greiare å vende fokus til aktivitetar og til media som kan underhalde og gje tankeflukt. Kan denne strategi-

en medverke til det oppjaga tempoet i mange sine liv? Aktivitet kan kompensere for frykten for uro? Det er vorte ein allergi mot dårlig samvit, og difor er det om å gjere å finne vegar bort frå det dårlige samvitet. Når ein slepp å bli minne på det som tyngjer, kan ein vonleg ha det lettare med seg sjølv. Men så kjem stilla, og minner oss på ny på etterlétet. Må vi stadig vere på flukt frå stilla?

1) Faste er tid for å vise takksemd ved å avstå frå nokre av Guds gode gaver. Alt vi har fått, er gaver frå Gud. Vi kan bli minne på gjevaren ved å sjå opp frå gava i fasta.


2) Faste er tid for å ta imot det som er meir verd enn dei jordiske gåvene: Guds nåde.

Fasta blir avslutta med den stille veka. Kanskje kan stilla vere ei hjelpe for oss, til å oppdage det grensesprengjande ved påskedagsunderet: Oppstoda, livet og nåden gjeven til alle som trur.

Nåden er ulik all fornying; det sprenger rammene for ommøblering og garderobefornyng. Alt vi etterlætar på blir sletta, og vi får begynne heilt på nytt. Kanskje er det verdt å lytte litt også til det som tyngjer oss, ta det med i stilla, og leggje det av oss i møte med han som tok på seg alt dette,

og gav oss nytt liv, ny nåde.

Fornyngja ved våren er nok kjærkomen for mange, og det er som eit under, skriv Blix: «Nytt liv av daude gror». Han tenkjer både på våren som kjem no i april og på det nye livet som høyrer æva til. Jesaja har denne helsinga frå Gud: «De skal ikkje minnast dei første ting, ikkje tenkja på det som hende før. Sjå, eg gjer noko nytt. No spirer det fram. Merkar de det ikkje?» Jes 43,18-19.



Kvart år seininters kjem fasta. For eit par år sidan skreiv eg i julenummeret av Kyrkjebladet om advent, og no nemner eg faste i nummeret som kjem etter påske. Stadig litt for seint ute, eller også kalla etterpåklokskap. Men, i takt med TV-programmet «Vi ser tilbake», som gjekk frå klokka 20:00 til klokka 19:30, tek eg eit blikk tilbake på fasta, og nemner eit par moment eg har tenkt på ved faste:



Biskop Halvor Nordhaug blir å sjå på Seljumannamessa saman med dronning Sonja. Foto:Jostein Risa

# Seljumannamessa 8. juli Bjørgvin bispedøme feirar 950 år med dronning Sonja til stades

AV ODDVAR ALMENNING

Kvart år blir det feira Seljumannamesse i Selje klosterruin den første søndagen i juli. I 2018 blir dagen feira søndag 8. juli, den eigenlege rette datoен for Seljumannamesse. I år er det 50 år sidan bispedømet vårt feira 900 år. Dermed kan vi feire 950-årsjubileum for det eldste bispedømet i landet!

## Dronning Sonja i einsam majestet

Til jubileet i 1968 kom kronprins Harald og Sonja til Selja i sitt første offentlege representasjonsoppdrag, og slottet har meldt at det denne gongen blir Sonja som kjem, åleine. Kongen er oppteken med andre ting. I 1968 kom det tusenvis til Selja, og ein ventar godt besök denne gongen, òg.

Men når kongelege er ute i oppdrag, kjem dei ikkje «åleine». På grunn av opplegget rundt sikring av følgjet, har vi enno ikkje fått detaljar på når eller kvar ho kjem, og på kva måte ho reiser. Vi synest likevel du skal setje av denne søndagen, så får du vite detaljar i komande nummer, i god tid før messa!

## Kva veit vi?

Vi veit at biskop Halvor Nordhaug blir predikant på messa, og at bispedømet vil spandere besök av Bergen domkor som «gåve» til si eiga feiring og til folket. Den vanlege Seljumannamesse-komiteen er forsterka med representasjon frå bispedøme, prosti, kommune, Riksantikvar og fylkesmann, så ingen ting skal vere utelate å tenke på når dagen kjem!

## Prosjektkor

Korsongarar er inviterte til å bli med i eit prosjektkor som skal øve laurdag og vere med på messa søndag. Innbyding til å bli med skal ha gått ut både til kyrkjekor og til kor i Norsk Korforbund, så vil du bli med, kan du spørje i ditt lokale kor.

## Konsertar

Det blir for tida arbeidd med innhaldet i konsertar både laurdag kveld og søndag ettermiddag, og vi kjem sterkt tilbake med detaljar i komande nummer av bladet!

Reis til Selja, der den norske kyrkja blei fødd!



# Sommarleirane 2018

**22.-24. juni (1.-4. klasse)**

**25.-28. juni (5.-7. klasse)**

sommar arrangerer vi to sommarleirar på Nesholmen. Nesholmen ligg i Gloppen kommune ved Storfjorden, ca. 50 minutt frå Førde eller Florø og ca. 1 times køyring frå Sandane. I år vil tema vere Nohas Ark under fokustimane. Vi kan garantere kjekke aktivitetar og trygge vaksne på verdas flottaste leirstad!

#### **Barneleir 1.-4. klasse 22.-24. juni**

Vi vil lage mat ute, padle, gå tur, bade og leike. På Holmen skal vi brenne bål, syng og ha dagens ord. Dei som vil, skal få høve til å spele ballspel og lære nye leikar. Arrangerast i år saman med Speidargruppa i Stryn. Kom, bli med oss!

#### **Aktivitetsleir 5.-7. klasse, 25.-28.juni**

Aktivitetsleir er leiren for dei eldste borna. Leiren går over fire dagar og består av eit variert program med fokus på uteaktivitetar. Det vil bli kano- og kajakkтурar ut på den vakre Storefjorden og mange mulegheiter for bading. Dersom du likar litt action og ballspel får du høve til å prøve det. I tillegg til uteaktivitetane blir det dans, leikeseminar og nesholmiade. Nytt i år vert flåtebygging etterfulgt av sjøslag

#### **Prisar**

Barneleir 1.-4. klasse

Medlem kr 850,- pr. barn pr. leir

Ikkje medlem kr 950,- pr. barn pr. leir

Aktivitetsleir kr 5.-7. klasse

Medlem kr 1.150,- pr. barn pr. leir

Ikkje medlem 1.250,- pr. barn pr. leir

#### **Deltakarfond**

Økonomi skal ikkje vere ein stoppar for deltaking hos oss. Les meir om vårt deltarfond på kfuk-kfum.no/deltakerfond.

#### **KFUK-KFUM Sogn og Fjordane**

Postboks 329, 6802 FØRDE

Tlf: 46915529 / 91173079

E-post: sfj@kfuk-kfum.no

Nettside: www.kfuk-kfum.no/sfj



- KONFIRMASJON
- BRYLLAUP
- GRAVFERD
- KVARDAG OG FEST

*Velkommen innom!*



Coop-bygget. Tlf. 57 86 59 57  
gloppenelkjop.no

Advokatane  
**LOTHE MARDAL & GJENGEDAL**  
MNA

Tlf. 57 88 44 00/Faks 57 88 44 01

Adresse: Grandavegen 5, 6823 Sandane. Postboks 138, 6821 Sandane  
[www.gloppenadvokat.no](http://www.gloppenadvokat.no)



Saman for eit betre miljø



Strukturplast



LEDIG PLESS

Godt mål  
Privatundervisning i nynorsk  
for vidarekomne innvandrarar  
@nynorskB2 på facebook

**HYEN**  
**RØR**  
TELEFON 97 03 92 28

Mål service og kunnishap lötys noha  
**DATA INSTITUTTET**  
[www.datainstituttet.no](http://www.datainstituttet.no)

**BOLSETH GLASS**

**FRYDENBØ**  
BILSENTER

**BRØDRENE AA**



**TRUCKNOR**  
SGØN OG FJORDANE

**TAXI**  
BYRKJELO  
TLF: 995 24 247

**BYGGtorget**  
BYGGEVAREN BYRKJELO AS  
Tlf. 57 02 01 60 / Mob. 908 90 791  
Gamlevegen 2 - 6826 BYRKJELO

**Ryssdal kraft**



Tannlege  
Øyvind Seim

Tlf: 57 86 50 24



Christina og  
Ane Jostein Gimrestad  
Telefon 57 86 78 73  
www.sandanegravferd.no  
Vi hjelper deg også med:  
Gavle, Oppussing og tiløyning av naten

Leif Lote elektro

Firda elektro



Jordnær og livskraftig

Grandavegen 9, 6823 Sandane

57 88 38 00

post@gloppen.kommune.no

www.gloppen.kommune.no



**Eikenæs;libris**  
BOKHANDEL - LEIKAR - KONTORREKVISTA

Eikenæs;libris

KOZMOS

kontorspar

Nordstrandsvegen 10,

6823 Sandane

Tlf. 57 86 44 10

eikenes@libris.no

www.libris.no/eikenes

Ope 10-18 (15)



Følg oss  
på facebook





KARI RYGG LEIRGUL

# Eg har ei teneste stor for Gud

Eg heiter Kari Rygg Leirgul. Dei første seks åra mine budde vi i Lørenskog. Så flytta vi til Årdal i Breim for å ta over garden som mor mi kom ifrå. Der vaks eg opp med tante Jenny i «gamlehuset», og vi fem syskena og mor og far i «nyehuset». Etter Firda jobba eg eitt år i barnehage i Egersund før eg kom tilbake til Nordfjord og var 9 år i barne- og ungdomsarbeidet i Indremisjonen. Så utdanna eg meg til lærar og arbeidde det første året mitt i Gjerdrum. Sommaren -96 gifta eg meg med Morten. Vi budde eitt år i Nordanland og to år i Stryn før vi bygde oss hus her på Vereide. Vi har fire born i alderen 15 til 21 år.

Matias Orheim var frå Stårheim, så songen har ein «lokal» forfattar. (Eg har vore kontaktlærar for eit av oldebarna hans.) Både Morten og eg er glade i denne songen, så på bryllaupsdagen vår var dette ein av songane vi hadde i kyrkja.

Det å vere i teneste for Gud handlar om heile livet. Eg er i teneste for han kvardag og helg, heime og ute. Det er ikkje noko eg gjer i ein avgrens del av tida mi slik det er med ein vanleg jobb. Matias skriv om at «arbeidstrøya er presteskrud». Det er lett å tenkje at det berre er presten som er i teneste for Gud og ikkje vi andre. Og at presten er i teneste for Gud berre når han har teke på seg «presteskrudet» sitt, at dette med å vere i teneste for Gud er noko veldig avgrens. Og så er det ikkje slik. Det handlar om heile livet.

Matias skriv i andre verset: «Når då eg spør meg kvar arbeidsdag: Kva ville Jesus vel gjere?» Dette er ei god konkretisering av kva det betyr i praksis å vere i teneste for Gud. I alle situasjonar eg møter i kvardagen skal eg tenkje:

Kva ville Jesus ha gjort i denne situasjonen? Det er kome ein meir moderne versjon av denne måten å tenkje på. What would Jesus do? Det er akkurat det same, berre på engelsk. Og det er laga armband med bokstavane WWJD som du kan ha på deg for å minne deg på å stille dette spørsmålet overfor det du møter i livet.

Men oj, oj, oj. Vert ikkje dette veldig travelt? Korleis skal eg få kraft til å leve slik? Matias har svar på dette også. Han skriv at «Jesus vil krafta vere». Jesus bur jo inni meg ved sin heilage Ande og han er krafta. Det gløymer eg ofte! Så eg strevar med å få til alt dette med mi vanlege menneskelege kraft. Og då er det rett som det er at det blir veldig «tungt og trått». Sjølvagt. Det er jo berre naturleg. Då må eg bruke bøna og Bibelen så eg får dei rette dimensjonane på plass og ikkje strevar i eiga kraft. «Med bøn og bibel vert allting godt». Eg måtte tygge litt på denne setninga. Tykkjer nok at det er litt sterkt å seie at ALLTING vert godt. Men eg erfarer at det å be og å lese i bibelen er VELDIG viktig for meg.

Tante Jenny hadde søndagsskule og barneforeining i stova si. I huset vårt hadde vi barnejuletrefest i romjula, og fredagskveldar gjennom vinteren hadde vi ungdomsgruppe. Dette å bruke heimen som kristen samlingsplass har eg såleis fått inn med morsmølka. Difor kjenner eg veldig glede over å få samle hjelpeiarane på søndagsskulen her heime av og til eller å ha gutebibelgruppe i stova vår. «Heimen han er mi kyrkje».

Eg utfordrar Reidun Sandøy Os til å skrive «Min salme» i neste nummer av Kyrkjebladet.

**Eg har ei teneste stor for Gud.**  
Norsk Salmebok nr.424

*Eg har ei teneste stor for Gud  
frå dag til dag i det stille,  
der kvardagsklede vert høgtidsskrud  
og livsens småting så gilde  
Ja, skal eg eingong det store få,  
eg må med truskap i alt det små  
i Jesu fotefar lydig gå og vilje  
det Jesus ville, og vilje det Jesus ville.*

*Når då eg spør meg kvar arbeidsdag:  
Kva ville Jesus vel gjere?  
Så gjev han livsmod og arbeidslag,  
så livet provar mi lære.  
Om av og til det vert kvardagsgrått,  
så det i striden går tungt og trått,  
med bøn og bibel vert allting godt;  
for Jesus vil krafta vere,  
for Jesus vil krafta vere.*

*I alt Guds vilje er underfull,  
han har til Ordet seg bunde,  
der perlesteinar og sylv og gull  
til livsens byggverk vert furne.  
Og når det eingong for alvor gjeld,  
og livet prøvast skal gjennom eld,  
Guds eige byggverk si prøve held.  
Av småting vert storverk vunne,  
av småting vert storverk vunne.*

*Så er mi teneste stor for Gud,  
og heimen han er mi kyrkje,  
der arbeidstrøya er presteskrud  
i alt mitt ørlege yrke.  
Så er det heime i stova fred,  
til alt mitt arbeid stig englar ned,  
dei har Guds rike velsigning med,  
som dagen så er min styrke,  
som dagen så er min styrke.*

Orsak for feil oppførte fadrar i førre nummer.

### Gimmestad

**26.12.2017**

#### JOHANNA BERG HORNTVEDT

INGUNN BERG

ARILD HORNTVEDT

Laila Berg

Erik Berg

Hilde Horntvedt

Cecilie Sæten

Tor Horntvedt

**02.04.2018**

#### NOAH DØSKELAND

SUNNIVA GROV DØSKELAND

KENT STIAN DØSKELAND

Jon Gunnar Tystad

Audhild Grov

Elin Torvik Grov

Rolf Erling Døskeland

#### MARIUS STØYLEN

ANDREA AMUNDSEN

PER-ANDERS STØYLEN

Terese Kandal

Reidar Kandal

Malene Støylen

Johanna Amundsen

Sigbjørn Thomassen

### Sandane

**25.03.2018**

#### THORVALD AA

HILDE RAKVAAG

ØYSTEIN AA

Kari Sælen

Lars Magne Rønneklev

Olav Marius Aa

Hanna Ommedal Aa

### Breim / Molde domkirke

**25.03.2018**

#### LISE MARI DIAS MOEN

FRANCISCA LUCIA DUARTE DIAS

TORE BJØRDAL MOEN

Jeanette Bratholm Gjelstenli

Øyvind Hole Holmë

### Breim

**11.03.2018**

#### ADA GLOPPESTAD HJELLE

INGRID GLOPPESTAD HJELLE

KENT ØYSTEIN HJELLE

Anne Britt Søreide

Runar Ryssdal

Lene Hjelle

Dan Kristian Hjelle

**25.03.2018**

#### TOBIAS FUGLESTRAND

MAI NYBORG

OLAV FUGLESTRAND

Sonja Fuglestrand Leine

Gerd Nyborg

Marie Nyborg

Ole Dan Fuglestrand

**01.04.2018**

#### RIKKE ESPE WILLUMSEN

MARITA ESPE

SINDRE WILLUMSEN

Eve Henriette Brandsøy Austrheim

Stine-Renate Årdal

Håvard Willumsen

Benedikte Gjesdal Sægrov

Bjørg Anita Espe

Vidar Bergheim

### Vereide

**11.03.2018**

#### RUBEN ERIKSTAD

SARA MARIE TYSTAD

JON-ARNE ERIKSTAD

Andrè Erikstad

Even Erikstad

Jon Gunnar Tystad

Elise Tystad

**01.04.2018**

#### PETER EIKENES

MARIA EIKENES

MATHIAS EIKENES

Bodil Eikenes Tjellaug

Jon-Terje Tjellaug

Elise Granheim Karlsen

Sunniva Austnes

Atle Kongsvold

### ABEL HALLANGER HJELMESET

FRIDA VICTORIA GREINER

HALLANGER

JAKOB HJELMESET

Ruben Andreas Greiner Hallanger

Eirik Hollekim

Tyra Hembre

Ove Hjelmeset

**15.04.2018**

#### ALDE ØYGARD HAFNOR

LOVISE ØYGARD HAFNOR

TORD HAFNOR

Mari Dahle Moltu

Svein Ivar Moltu

Christina Mari Toogood

### Hyen

**04.02.2018**

#### VILJAR OPPHEIM RØNNEKLEIV

SYNNE MARIE OPPHEIM

EVEN RØNNEKLEIV

Anne Katrin Oppheim

Vetle Andre Krohn-Olsen Ottersen

Karoline Førde Oppheim

Nina Helen Oppheim

Tone Elisabeth Rønneklev

Eldar Rønneklev



## Gravlagde

### Breim

Jarle Egge	14.06.45	15.03.18	22.03.18
------------	----------	----------	----------

Leidulv Egge	08.06.57	15.03.18	22.03.18
--------------	----------	----------	----------

### Hyen

Magnhild Margit Solheim	05.04.25	10.03.18	16.03.18
-------------------------	----------	----------	----------

Svanhild Borgny Solheim	28.11.25	04.04.18	06.04.18
-------------------------	----------	----------	----------

Magnhild Kjellaug Holme	23.09.24	07.04.18	12.04.18
-------------------------	----------	----------	----------

### Vereide

Peder Bernhard Eikeset	06.05.39	28.02.18	09.03.18
------------------------	----------	----------	----------

Gunnar Karstein Tystad	25.08.18	18.03.18	23.03.18
------------------------	----------	----------	----------

Anne Marit Kalsnes	23.06.50	26.03.18	05.04.18
--------------------	----------	----------	----------

Peter Holvik Lothe	19.06.62	14.04.18	26.08.18
--------------------	----------	----------	----------

### Bisetjing Gimmestad

Geir Grov	19.11.48	08.01.18	18.01.18
-----------	----------	----------	----------

Oddbjørg Borghild Sande	21.08.32	15.04.18	20.04.18
-------------------------	----------	----------	----------

## GLOPPEN SOKN

Leiar i soknerådet: Beate Kornberg tlf. 909  
43 304 / beate.kornberg@me.com  
Kyrkjetenar: Benny Aasen, tlf: 950 22 917 /  
bv-aasen@online.no

## BREIM SOKN

Leiar i soknerådet og kontorsekretær:  
Venke Kollbotn, tlf. 977 77 383  
Epost: venkekoll@hotmail.com  
Kyrkjetenar: Audhild Bogstad, tlf. 970 24 913

## HYEN SOKN

Leiar i soknerådet: Solveig Hope  
Tlf: 905 38 304  
epost: olajan.birkeland@ekontor.no  
Kyrkjetenar: Ola Jan Birkeland  
Tlf: 57 86 98 32 / 975 91 747

## Sokneprest i Gloppe sokn

Vidar Bjotveit, tlf. 958 80 030  
vidar.bjotveit@gloppen.kyrkja.no  
Kontorstad: Sandane kyrkje

## Sokneprest i Breim og Hyen sokn

Tore Myklebust, tlf. 456 01 260  
tore.myklebust@gloppen.kyrkja.no  
Kontorstad: Prestebustaden i Breim.

## Kyrkjeveje

Kurt Djupvik, kontor i Sandane kyrkje  
Tlf kontor: 57 86 56 16. Mobil: 902 06 828.  
post@gloppen.kyrkja.no

## Kantor

Anders Rinde, mobil: 997 20 238  
anders.rinde@gloppen.kyrkja.no  
Vereide kyrkje, tlf. 57869306

## Kyrkjelydspedagog

Lars-Bjarte Osland, tlf 990 03 077  
lars-bjarte.osland@gloppen.kyrkja.no

## Trusmedarbeidar:

Ingrid Bjørnereim, tlf. 988 03 053  
ingrid.bjornereim@gloppen.kyrkja.no

## Gravar/ kyrkjegardsarbeidar

Ivar Hjelle, tlf: 57 86 58 59 / 970 76 668



# Vi møtest i kyrkja

<b>10. mai</b> Helgetorsdag Luk 24,46–53 Jesu avskjed	11:00	«Draumkvila» i Trivelsskogen.	Gudsteneste med pilegrimsvandring. Kyrkjekaffi. Liturger Vidar Bjotveit og Sigurd Vengen. Pilegrimsvandring fra parkeringsplass. Sjå oppmøtetid i Firda Tidend.
	11:00	Hyen	Konfirmasjonsgudsteneste. Liturg Tore Myklebust. Takkoffer til kyrkjelydsarbeidet.
<b>13. mai</b> 7. søndag i påsketida Joh 3,16–21 Lyset er kome til verda	11:00	Sandane	Gudsteneste med søndagsskule. Liturg Vidar Bjotveit. Kyrkjekaffi. Takkoffer til Norges Kristelege student og skuleungdomslag.
	21:00	Vereide	Kveldsgudsteneste. Liturg Eivind Nilsen. Nattverd.
<b>17. mai</b> Matt 22,17–22 Gje keisaren det som hører keisaren til	10:15	Hyen	Festgudsteneste. Liturg Vidar Bjotveit. Takkoffer til misjonsprosjektet.
	11:00	Breim	Festgudsteneste. Liturg Tore Myklebust. Breimskoret deltek. Takkoffer til kyrkjelydsarbeidet.
	12:00	Vereide	Festgudsteneste. Liturg Vidar Bjotveit. Speidaren deltek. Song av Austrheim mannskor. Takkoffer til Redd Barna.
	15:00	Gimmestad	Festgudsteneste. Liturg Vidar Bjotveit. Takkoffer til Redd Barna.
<b>20. mai</b> Pinsedag Joh 14,15–21 Sanningsanden og Jesu bod.	11:00	Breim	Konfirmasjonsgudsteneste. Liturg Tore Myklebust. Takkoffer til kyrkjelydsarbeidet.
	11:00	Gimmestad	Konfirmasjonsgudsteneste. Liturg Vidar Bjotveit. Takkoffer til kyrkjelydsarbeidet.
<b>21. mai</b> 2. pinsedag Joh 14,15–21 Sanningsanden og Jesu bod.	11:00	Vereide	Høgtidsgudsteneste. Liturg Tore Myklebust. Nattverd. Takkoffer til Normisjonen sentralt.
<b>27. mai</b> Treeningssøndag Luk 10,21–24 Jesus jubla i Anden.	10:00	Vereide	Konfirmasjonsgudsteneste. Liturg Vidar Bjotveit. Kyrkjekoret deltek. Takkoffer til kyrkjelydsarbeidet.
	12:00	Vereide	Konfirmasjonsgudsteneste. Liturg Vidar Bjotveit. Kyrkjekoret deltek. Takkoffer til kyrkjelydsarbeidet.
	11:00	Breim	Gudsteneste. Liturg Tore Myklebust. Takkoffer til Nesholmen.
	21:00	Sandane	Kveldsgudsteneste. Liturg Eivind Nilsen. Nattverd. Siste i vårsesongen.
<b>1. juni</b>	16.15	Gloppe omsorgssenter	Nattverdsgudsteneste. Liturg Vidar Bjotveit
<b>3.juni.</b> 2. søndag i treningstida Joh 3,26–30 Han skal veksa, eg skal avta.	11:00	Breim	Gudsteneste. Liturg Tore Myklebust.
	15:00	Sandane	Generasjonsgudsteneste, eldre særskilt inviterte. Liturg Vidar Bjotveit. Takkoffer til Diakoniarbeidet.
<b>10. juni</b> 3. søndag i treningstida Joh 1,35–51 Dei fyrtse lærresveinane.	11:00	Vereide	Gudsteneste. Liturg Olaf Sigurd Gundersen. Takkoffer til misjonsprosjektet vår, kyrkjeleg undervisning i Kina.

## Konfirmasjon - konfirmantar, sokn og tidspunkt

**Hyen kyrkje**  
**10. mai, kl. 11.00**

Eline Rønneklev  
Eirik Rønneklev  
Malene Holme  
Thomas Sæten

**Breim kyrkje,**  
**20. mai, kl. 11.00**

Mina Emilie Berentzen  
Tobias Fuglestrand  
Per Martin Solbakke Flølo  
Margit Røyseth Seime  
Sunniva Egge Søvde  
Kristoffer Gåsemøy  
Elias Natås  
Håvard Hetle  
Vegard Bjørkelo  
Maria Birkeland Hetle  
Malena Reed  
Mathias Andreas Reksten Dale  
Marthea Felde  
Tilde Sæthre  
Kristian Sundal Førde  
Ole Gøran Bø  
Kaisa Hole  
Elias Helle Felde

**Gimmestad kyrkje**  
**20.mai, kl. 11.00**

Sander Natanael Rauset Skogli  
Elin Mardal  
Andrea Mellingen Lothe  
Amalie Langeteig Skeistrand  
Mads Eikrem Søreide  
Emma Mellingen Lothe  
Emily Olin Wilke  
Jonas Aagaard Arnestad  
Julie Kristin Skjerdal  
Mathias Lothe  
Maren Brunsvik Rygg  
Thea Rygg  
Alice Kandal Mjøs

**Vereide kyrkje**  
**27.mai, kl. 10.00**

Michael Gustavsen Aase  
Fredrik Osa Holtan  
Berit Leirgul  
Kjetil Drageset Nes  
Anna Fjellestad  
Mari Solheim  
Elias Eikenes Osland  
Sivert Fure Skinlo  
Joakim Kristoffer Sola Strand  
André Aske Granheim  
Jørgen Devik  
Markus Berle Fjellestad  
Melos Kibreab  
Markus Gald Myklebust  
Maja Selsvik  
Anna Søreide Gjengedal  
Tobias Øren Leirgul  
Naod Issak  
Eirik Søreide Gjengedal

**Vereide kyrkje**  
**27.mai, kl. 12.00**

Håkon Mølmann  
Mathea Adelin Solheim Løken  
Isak Ryssdal Befring  
Tobias Mølmesdal Aaberg  
Hallvard Bjotveit  
Elias Gloppestad Solberg  
Sunniva Irene Solibakke Fure  
Leah Røed Frøyset  
Lars Olav Gjengedal  
Thea Christine Evebø  
Henrik Holmøy Holvik  
Adrian Larsen Evebø  
Rebecca Røed Frøyset  
Mia Huus Fjellestad  
Torgier Maritsson Grøneng  
Berent Sandene  
Sindre Solid  
Emma Holvik  
Dina Elise Fossheim

## Kontaktinformasjon

**Kyrkjeblad for Gloppe**  
[www.gloppen.kyrkja.no](http://www.gloppen.kyrkja.no)

Utgjeve av sokneråda i Breim, Gloppe og Hyen. Kjem ut minst 7 gongar i året på Sandane. Betaling etter ønske.  
Bankkonto: 3705 04 71307

### Redaktør:

Oddvar Almenning  
Tlf. 400 04 377  
E-post: oddvar@svale.no

### Grafisk design:

Innholdspartner AS v/Bjørnar Aske  
Tlf. 901 37 252  
E-post: bjornar.aske@innholdspartner.no

### Trykk:

Druka, Klaipeda

### Kasserar:

Venke Kollbotn, Breim sokn  
Tlf. 97 77 73 83  
E-post: venkekoll@hotmail.com

### Distribusjonsansvarleg:

Harald Aske  
Tlf. 57 86 57 30 / 970 24 915

### Redaksjonsnemnd:

Tore Myklebust  
Tlf. 456 01 260  
E-post: tore.myklebust@gloppen.kyrkja.no

Vidar Bjotveit  
Tlf. 958 80 030  
E-post: vidar.bjotveit@gloppen.kyrkja.no

Anders Rinde, administrasjonen  
Tlf. 57 86 93 06 / 997 20 238  
E-post: anders.rinde@gloppen.kyrkja.no

Harald Aske, Gloppe sokn  
Tlf. 57 86 57 30 / 970 24 915  
E-post: harald.aske@enivest.net

Solveig Hope, Hyen sokn  
Tlf. 905 38 304  
E-post: olajan.birkeland@ekontor.no

Gunn Hole, Gloppe sokn  
Tlf. 454 23 728  
E-post: gunn.sol@gmail.com

Rønnaug Ryssdal, korrekturlesar  
Tlf. 950 72 392  
E-post: ryssd@online.no

**17. juni**  
4.søndag i treningstida  
Matt 16,24-27  
Å fylgte etter Jesus.

11.00	Sandane	Gudsteneste. Liturg Tore Myklebust. «Skaperverkets-dag» Takkoffer til NRC Flyktninghjelpen.
15.00	Breim	Generasjonsgudsteneste, eldre særskilt inviterte. Liturg Tore Myklebust. Takkoffer til diakoniarbeidet.

**23.juni**  
Jonsok  
Matt 11,7-14  
Johannes er Elia.


18.00 Gimmestad Gudsteneste. Liturg Tore Myklebust.

**24.juni**  
4.søndag i treningstida  
Matt 7,21-29  
Falske læresveinar og huset på fjell.

11.00 Hyen Gudsteneste. Liturg Tore Myklebust. Nattverd.  
Takkoffer til Fjordly.

**1.juli**  
6.søndag i treningstida  
Matt 16,13-20  
Peter si vedkjenning.

11.00	Vereide	Gudsteneste. Liturg Tore Myklebust. Takkoffer til Kristent interkulturelt arbeid. KIA.
15.00	Breim/ Skinlostøylen	Friluftsgudsteneste. Liturg Tore Myklebust.



## Kyrkje på pinsetur

Dette måleriet heng i Sandane kyrkje og er laga av kunstnaren Oddvar Torsheim, f. i 1938 i Bergen. Dei første barneåra hadde han på Rovde. Ni år gammal flytte han til Naustdal, der faren vart klokkar og skulemeister. Mange søndagar heldt han til i klokkarstolen i Naustdal kyrkje, der han ikkje alltid sat heilt i ro, men frå kyrkja og heimen fekk han eit livssyn han alltid har hatt med seg.

I Torsheim sin kunst er der surrealisk, innhaldsrik humor og frodigheit, men også alvor. Han er representert på Nasjonalmuseet/Museet for samtidskunst.

Han har sjølv gjeve denne tolkinga av bildet i Sandane kyrkje: «Kyrkja på skipet er blå fordi det er eit åndeleg hus. I røyken som stig opp er

der både - og +. Alt i kyrkja er ikkje like bra. Men - på - gjev +. Styggen sjølv tittar og fram: «Han er der nok.» På roret står ein kross, uttrykk for salmestrofa: «Den Herre Jesus meg kursen gav, og denne kurs vil jeg følge.» I djupet er den grusomme slangen. Han har og eit hjarte som vert forferd over kva han kan gjere. Øvst kjempar lyset og mørket, symbolisert ved sola og torshammarane. Nedst er der 11 ½ læresvein. Mattias er den halve, og han var ikkje kalla av Jesus sjølv. Dei mottek Den Heilage Ande. Eldtungene har ulike fargar, for å gje uttrykk for at dei har fått ulike nådegåver. Hanen stemner framover. Skipet skal nå målet sitt.

- Olaf Sigurd Gundersen